

清

史

稿

清史稿

列傳七十一

覺羅滿保

字 亮

施世驄

藍廷珍

從弟 淵元

林亮

何勉

陳倫鳳

歐陽凱

嘉慶 貢

游 俠 功

覺羅滿保字亮山滿洲正黃旗人康熙三十三年進士選庶吉士授檢討累遷國子監祭酒擢內閣學士直經筵五十年授福建巡撫疏言福建興化泉州等屬十六州縣皆瀕海要地請揀選直省卓異官除授御史驟廷祐論其不可部議以爲然詔下九卿等再議卒從滿保言五十四年擢福建浙江總督命巡海議自乍浦至南澳沿海五千餘里建臺寨百二十七所礮位千一百七十有八別疏言鹿耳門爲臺灣咽喉澎湖爲廈門藩衛安平鎮爲水師三營重地及海洋各口岸宜分極衝次衝築墩臺設汛巡守並嚴察海船出入禁漁船私載米糧軍器又言淡水雞籠山爲臺灣北界其澳港可泊巨艦百餘更進爲肩豆門沃野百里番社交據請增置淡水營設官駐防爲後蔽皆報可六十年鳳山民

朱一貴爲亂臺灣知府王珍苛稅濫刑鳳山民黃殿李勇吳外等集數百人謀變一貴素販鴨託明裔以爲渠劫岡山塘榔榔林二汛掠軍器衆益聚遂破縣城進陷臺灣總兵歐陽凱等率兵禦賊師敗績死之臺廈道梁文煊等走澎湖滿保疏聞督兵趨廈門值淫雨乘竹兜從數騎行泥淖中比至籍丁壯剽悍能殺賊者悉充伍嚴申軍令禁舟師毋登陸民以不擾淡水營守備陳策使詣廈門乞援滿保移會巡撫呂猶龍遣兵自閩安渡淡水未幾南澳鎮總兵藍廷珍率舟師至滿保命統水陸軍會提督施世驃於澎湖剋期進剿六月世驃廷珍攻鹿耳門敗賊安平鎮遂克臺灣上以臺灣民附亂非本意敕滿保招撫尋諸羅民楊旭等密約壯丁六百人擒一貴及其黨十二人獻世驃軍前檻送京師磔於市是役自出師迄事平凡七日上嘉滿保調度有方加兵部尙書尋疏言賊起惟守備陳策鼓勵兵民堅守汛地待大兵進援奮力效忠命擢臺灣總兵復疏劾珍縱役需索致一貴乘機倡亂文煊及所屬官吏一無備禦退回澎湖應奪官逮問從之文煊等論罪如律秋臺灣興作滿保以聞諭臺灣有司平日

貧殘激變及大兵進剿殺戮之氣上干天和令速行賑卹上杭民溫上貴往臺灣從一貴得僞元帥札印還上杭煽鄉人從賊聞一貴誅走江西結棚匪數百謀掠萬載知縣施昭庭集營汛剿捕擒上貴及其黨十數人並伏法大學士白潢等條奏禁戢棚匪滿保疏言閩浙兩省棚民以種麻錠造紙燒灰爲業良莠不一令鄰坊保結棚長若有容庇匪類依律連坐有司於農隙遍履各棚嚴加稽察浙江鄞奉化等二十七縣福建閩龍巖等四十州縣皆有棚民宜如沿海州縣例揀員題補詔從之雍正三年卒官遺疏言新任巡撫毛文銓未至總督印信交福州將軍宜兆熊署理並留解任巡撫黃國材暫緩起程如舊辦事詔嘉其得體下部議卹時尙書隆科多獲罪鞫訊得滿保餽金交通狀世宗諭責滿保諂隆科多年羹堯命母賜卹予諡策字鍾侯福建晉江人由銅山守備調淡水一貴陷臺灣策孤軍力守一隅姦人范景文入境煽誘禽誅之師下臺灣滿保檄勦北路復南嵌竹塹中港後壘吞霄大甲諸社以功擢臺灣總兵加左都督卒

施世驄字文秉靖海侯烺第六子康熙二十二年世驄年十五從烺下臺灣委署守備臺灣既定以功加左都督銜授山東濟南城守參將三十五年聖祖親征噶爾丹天津總兵居昇龍薦世驄從軍召試騎射命護糧運至奎素從大將軍馬斯喀追賊至巴顏烏爾師還假歸葬上褒世驄勤勞命事畢仍還任累遷浙江定海總兵四十二年上南巡賜御書彰信敦禮榜時海中多盜世驄屢出洋巡緝先遣裨將假商船創盜擒獲甚衆斬盜渠江崙四十六年上南巡詢及擒斬海盜事溫諭嘉獎賜孔雀翎四十七年擢廣東提督五十一年調福建水師提督六十年朱一貴爲亂陷臺灣世驄聞報即率所部進扼澎湖總督滿保檄南澳總兵藍廷珍等以師會衆議三路進攻世驄謂南路打狗港在臺灣正南南風盛不可泊北路清風隙去府百餘里運餉艱度賊必屯聚中路宜直搗鹿耳門時臺地諸將吏皆退次澎湖惟淡水守備陳策堅守汛地世驄遣游擊張賊等赴援自統師出中路選勁卒乘小舟載旗幟分伏南北港六月抵鹿耳門賊踞礮臺以拒世驄登樓船督戰發礮中敵貯火藥器火大熾賊驚潰衆軍

齊進兩港悉樹我軍幟賊不敢犯揚帆直渡鯤身鯤身者海沙也水淺大舟不能過是日海水驟漲八尺餘舟乘風疾上遂克安平鎮翌日戰破賊賊悉聚來犯世驃遣守備林亮等進西港游擊朱文等越七鯤身自鹽埕大井頭分道登陸趨臺灣世驃督將士指揮布陣擊賊賊潰遂復臺灣一貴走諸羅諸羅民縛以獻賊黨擒斬略盡臺灣南北兩路悉平詔優敘賜世驃東珠帽黃帶四團龍補服未幾以疾卒於軍遣疏乞從父烜葬福建留妻子守墓上悉許之贈太子太保諡勇果雍正元年世宗命予一等阿達哈哈番世職以其子廷勇嗣世驃和易謙雅治軍嚴明與烜先後平臺灣皆以六月乘海潮異漲度師遂以成功藍廷珍字荆璞福建漳浦人少習騎射從祖理器之入伍自定海營把總累遷溫州鎮標左營游擊巡外洋屢獲盜盜皆畏避以是爲諸將所忌諱於總督滿保將劾之會關東大盜孫森等竊遼陽巨礮戰艦逸入海聖祖震怒責沿海疆吏嚴緝廷珍出巡海至黑水外洋與遇力戰盡獲森等九十餘人及其船艦礮械滿保按部至溫州廷珍迎謁以告滿保嘆曰幾失良將召入舟厚撫之亟疏

馮超擢福建澎湖副將未幾遷南澳總兵六十年朱一貴爲亂廷珍上書滿保策破賊狀滿保令統戰船四百將弁一百二十官兵一萬二千會提督施世驤於澎湖剋期進剿廷珍至澎湖言於世驤曰賊皆烏合不足憂惟脅從至三十萬人請檄示止殲渠魁餘勿問則人人有生之樂無死之心可不血刃乎也世驤從之師至鹿耳門賊扼險拒守諸將林亮董芳當前鋒殊死戰廷珍率大隊繼之連戰皆捷賊大潰退保府治世驤遣亮等自西港仔暗度廷珍以大軍躡其後賊在蘇厝甲與亮等決戰廷珍分兵馳赴之賊望見旗幟戰稍卻乘勝追逐遂大潰夜駐犂頭標設伏以待賊果至四面突擊賊大亂自相攻殺追敗之本柵仔復敗之蔦松溪遂入府城秋毫無所犯民大悅一貴及其黨李勇吳外等皆就擒分遣諸將復南北二路署臺灣總兵秋南路阿猴林餘孽復起討平之招降陳福壽等十數人皆渠魁也未幾世驤卒廷珍攝提督餘賊黃殿等以次擒滅六十一年授臺灣總兵雍正元年擢福建水師提督加左都督賜孔雀翎予三等阿達哈哈番世職世宗褒廷珍忠赤惟屢勉以操守二年入覲命赴

馬蘭峪謁景陵賞賚稠疊七年病聞遣醫診視尋卒贈太子少保諡襄毅子日龍嗣世職官銅山營參將孫元枚自有傳族弟鼎元字玉霖力學負才廷珍統師入臺灣鼎元參軍事著平臺紀略雍正元年詔舉文行兼優之士貢入太學有司以鼎元薦大學士朱軾器之用薦得召見上書陳時政上嘉納授廣東普甯知縣居官有惠政長於斷獄性伉直坐事劾罷總督鄂彌達白其誣召詣京師旋署廣州知府甫一月卒鼎元嘗論臺灣善後策謂諸羅宜畫地更設一縣總兵不可移駐澎湖後諸羅析縣曰彰化更設北路三營總兵官仍駐臺灣皆如鼎元言

林亮字漢侯福建漳浦人少習騎射擊刺生長海濱島澳險夷舟航利鈍靡不講求初授臺灣水師把總累遷澎湖協守備朱一貴陷臺灣官吏渡澎湖居民洶懼將吏以孤島難守僉議撤歸廈門各遣家屬登舟亮按劍厲聲曰朝廷疆土尺寸不可棄今鋒刃未血相率委去縱避賊刃能逃國法乎請整兵配船守禦要害賊至決死戰戰不捷亮死君等去未遲乃馳赴海口申號令驅將吏家



屬登岸令敢言退廈門者斬時糧絕饑民亮輸貲買穀碾米給軍製戰攻器械俟師至提督施世驄總兵藍廷珍以亮忠勇令當前鋒領舟師五百七十人抵鹿耳門一貴黨蘇天威據礮臺以拒亮率六艦直進發礮中敵火起斃賊無算乘勝進攻安平鎮亮先登樹幟賊潰走翌日鏖戰鯤身駕舟橫衝賊陣復大敗之賊退至府城世驄令亮分兵自西港仔暗度拊其背廷珍以軍繼進大戰賊死傷遍野遂克府治亮功最遷臺灣參將雍正元年敘平臺灣功加都督同知予一等阿達哈哈番世職是年秋入京上深嘉之擢水師副將賜孔雀翎二年授臺灣鎮總兵亮以臺灣初被兵加意撫綏整水陸兵防又招撫生番一百八社男婦一萬八百餘人亮因番嗜色布鹽糖遣吏歷各社賚賜之因宣布德意羣番悅服五年移浙江定海卒於官賜祭葬何勉字尚敏福建侯官人初授督標把總康熙五十八年薛彥文等聚後洋山爲匪勉奉檄捕擒之六十年從提督施世驄討朱一貴勉攻南路擒其黨杜會三蘇清等又於北路獲黃潛等二十六人明年遷臺灣鎮標千總時一貴餘黨王忠等出沒內山巡視臺灣御史

吳達禮督捕治總兵藍廷珍檄勉偵緝遣降卒爲導入鳳山深箐中獲賊黨劉富生思拒捕立擒之擢北路營參將予拖沙喇哈番世職雍正四年水連沙等社叛番蠢動總督高其倬檄從臺灣道吳昌祚按治勉攻北港番請降水連沙二十五社悉平遷湖廣洞庭協副將十年貴州九股苗作亂詔發湖廣兵二千協勦提督張正興檄勉領兵五百赴貴州進攻交汪寨勉乘霧夾擊苗敗遁復據蓮花峯築屯時貴州提督哈元生自台拱移軍至令勉攻其束勉先登奪壘賊竄走掩擊之陣斬其渠餘衆就擒擢雲南鶴麗鎮總兵調臨元復調廣東左翼五年調臺灣尋又移南澳署福建水師提督乾隆十年以疾乞休詔解任回籍調治尋召詣京師以篤老命原品休致十七年卒賜祭葬子思和嗣世職二十七年復官臺灣總兵陳倫炯字次安福建同安人父昂字英士弱冠賈海上習島嶼形勢風潮險易施煇征臺灣徵從軍有功授游擊累遷至碣石總兵擢廣東右翼副都統嘗上疏言西洋治厯法者宜定員毋多留留者勿使布教又以沿海居民困於海禁將疏請弛之會疾作命倫炯以遺疏進詔報可倫炯初

以蔭生授三等侍衛雍正初授臺灣總兵調廣東高廉坐事降臺灣副將復授總兵歷江南蘇松狼山諸鎮擢浙江提督卒昂疏並言臣詳察海上諸國東海日本爲大次則琉球西則暹羅爲最東南番族文萊等數十小國惟噶囉吧呂宋最強噶囉吧爲紅毛一種中有英圭黎干絲蟻和蘭西荷蘭大小西洋各國和蘭西最兇狠與澳門種人同派習廣東情事請敕督撫關差諸臣防備於未入港之先取其火礮另設所關束每年不許多船並集下兵部但令沿海將吏晝夜防衛寢昂議倫燭爲侍衛時聖祖嘗召詢互市諸國事對悉與圖籍合時互市諸國奉約束惟謹獨昂倫燭父子有遠慮憂之最早云

歐陽凱福建漳浦人起行伍累官江南蘇松水師營總兵康熙五十七年調福建臺灣鎮以功加左都督六十年朱一貴作亂官軍遇賊於赤山千總陳元戰死賊進攻鳳山把總林富戰死守備馬定國自殺凱率所部守備胡忠義千總蔣子龍把總林彥禦之春牛埔參將羅萬倉遊擊孫文元城守遊擊許雲守備游崇功千總趙奇奉林文煌把總李茂吉率水師來會力戰破賊次日賊大至

凱力戰與忠義子龍彥俱沒於陣賊截凱首去雲崇功奇奉文煌同日戰死茂吉被執不屈死賊陷府治萬倉戰死文元奔鹿耳門投海死同死者游擊王九人守備吳泰嵩又有把總石琳自汀州被檄至臺灣遇變被圍死之六月師克臺灣一貴既誅獲其黨黃殿等械送福州獄雍正元年二月賊破械斬關出至下渡尾都司閻威守備楊士虎逐捕殺數賊被創死先後議卹凱贈太子少保廢守備雲以下皆贈官于世職有差羅萬倉甘肅南夏人官北路參將凱戰死賊攻府城萬倉督將卒登埤發大礮擊賊仆賊旗賊大至萬倉出城與戰踰溝墜馬賊以竹篙刺其喉猶揮刀殺賊乃死妾蔣聞報自經殉游崇功字仲嘉福建漳浦人材力雄健從總兵蔡元鎮襄陽補右營把總累遷福建長福營守備分防長樂縣濱海有磁澳賊艘所出沒崇功廉得狀以兵二百伏隘口入澳捕之賊棄舟登岸伏發擒十七人自是島澳肅清長樂水災崇功關巡撫滿保請發粟平糶民食以濟調臺灣北路營守備巡緝外洋擒海賊陳阿尾等六十餘人遷水師游擊一貴作亂崇功方出洋巡哨聞報率兵還赴安平至則賊已熾

清 易 年  
崇功急登岸赴敵其婿蔡章琦叩馬請一過家門區處眷屬崇功不顧躍馬揮  
衆殺賊甚衆五月朔賊數萬戰於春牛埔凱戰死崇功突圍衝擊馬被創遂歿  
於陣章琦國子監生聞崇功戰沒赴海死

論曰國家承平久禁綱疏閭官吏緣爲奸措克聚歛以取怨於民臺灣懸海外  
一夫發難郡縣皆不守鎮將戰死滿保聞亂投袂即行世驄廷珍皆名將能盡  
其材遂以成功有將將之略焉世驄上承煥廷珍下啟廷枚並爲將門致果克  
敵謀勇兼之亮以裨佐効死不去繫民望勉入險禽渠先後繼廷珍後當干城  
之任厥績懋哉

清史稿

列傳七十二

王紫綬

袁州佐

黎士宏

多宏安

休國聘

王 繻

田 聖 瑞

張孟球

王紫綬字金章河南祥符人順治三年進士選庶吉士散館授編修乞養歸僑寓蘇門山中從孫奇逢講學居十有七年母歿服闋康熙十二年授江西贛南道副使吳三桂反贛南總兵劉進寶有謀略紫綬推誠結納預籌防禦既而江西降衆屯壑者相繼叛惟贛南尙未動紫綬與進寶謀閩粵反已見端贛南扼其間應援前朝故事設巡撫以資鎮攝中疆吏上請允之十四年賊勢益熾山寇遽起鎮兵疲於奔命乃練鄉勇以輔之屢殺賊有功十五年巡撫白色純及進寶先後卒官參將周球領鎮兵三桂將高得捷韓大任據吉安餉道絕屬縣相繼陷大任屢致書勸降送僞署巡撫劄紫綬斬其使球以乏餉爲難紫綬集士商勸輸間架稅得白金四萬畀球餵以無缺鎮南將軍覺羅舒恕率禁旅下

廣東爲尙之信將嚴自明所敗兵退距贛州三十里自明約得捷由吉安會師夾擊紫綬薦降將許盛率所部漳州水兵五百人益師夜泗江斫賊營禁旅繼之擊敗自明得捷等勢孤不敢復窺贛鎮兵出勦土寇掠村民紫綬曰鄉民脅從若並以賊論贛南二府十六縣將無子遺戒鎮將毋妄發兵飭有司招撫分別留遣賑濟難民境內稍安乃規復萬安泰和兩縣自螺山間道達墨潭可登舟於是南昌道始通運餽銀十萬至又發附近倉穀贍軍人心大定巡撫修國禎亦自間道至始知紫綬已擢浙江督糧道參政贛南久不通驛報大學士李霽言於朝曰紫綬死守危疆三年於茲爲國惜才援而出之猶可大用故有是擢紫綬聞命泣下十六年上官察積弊嘆曰糧官不可爲也漕截減而軍困白折浮而民困吾安忍竭東南之澤而漁之一月卽引疾去迨開博學鴻詞科魏象樞以紫綬與湯斌同薦入試放還卒

袁州佐字左之山東濟寧人順治十二年進士授陝西乾州知州入爲工部員外郎遷郎中有清直聲胥吏不敢牟利時山陵工巨經費浩穰州佐曰民困極

矣寸縑尺縷皆閭閻膏血力清乾沒司焚帛省金錢鉅萬出爲陝西甘山道僉事青海蒙古諸部覬得大草灘爲牧地康熙九年偕提督張勇度地畫界堅拒寢其議自後青海蒙古諸部人不敢復窺邊歲協西甯餽運負載千里甘州民苦之州佐力請得罷甘州駐兵數千待饟急力爲籌備軍得宿飽十年遷直隸口北道參議地確民貧逋課積累倉儲歷歲侵漁耗蝕無算州佐請按籍覈實清宿蠹大吏懼以失察得罪陽蹙而陰沮之州佐擘畫盤錯致疾乞休未去官卒州佐在甘州久言邊境要害戰守狀原委覲然謂邊地民稀宜用開中法分河東鹽引三之一輸粟河西資軍食又宜簡練鄉勇拔置卒伍不待召募可坐收精銳時詔簡監司具才望者入爲卿貳州佐在選會卒未及用

黎士宏字魏曾福建長汀人少讀書山中二十年篤於孝友順治十一年舉順天鄉試授江西廣信府推官勦強糾貪奸宄歛戢理獄牘脫無罪數百人時爲語曰遇黎則生署玉山縣事兵後城中草三尺不辨街巷居民纔三十二家士宏立學建治招集流亡墾田定賦民復舊業裁缺改授永新知縣政清獄簡與



民休息舊例二月開徵五月解其半士宏陳於上官曰縣小民窮二月寫租十石貸銀一兩三月可減至六石四月則三石請以四月開徵五月解展兩月之徵已爲窮民留數萬之糧布政使劉樾素寬仁即允之甲訴乙悔婚鄉俗婚書各裝爲卷書男女生辰兩造固隣舊女生辰所素悉僞爲卷爲證士宏先問媒證乙得甲聘禮若干行聘時有何客媒證出不意妄舉以對復問甲所對各異擘視卷軸竹猶青笑詰之曰若訂婚三載卷軸竹色猶新此非臨訟僞造者乎甲乃服罪縣吏左梅伯有叔富而無子梅伯糾賊劫殺之獲賊而梅伯逃士宏抵任叔妻哭訴陰迹梅伯匿安福勢宦家故緩詞曰此舊事前官不了余安能按之數月梅伯歸叔妻復訴置不問梅伯且出收叔遺產叔妻號於庭曰公號廉明今寬殺人者罪且占寡婦田何得爲廉明陽怒批其牘曰止問田土不問人命梅伯益自得赴縣訴理乃笑謂曰候汝三載矣批其牘曰止問人命不問田土梅伯遂伏法其善斷獄多類此考最擢陝西甘肅同知復考最擢江南常州知府吳三桂亂起關隴震動大吏疏請擢洮西道副使未到官而洮岷陷邊

外羣番乘亂內犯肆剽掠調署甘山道王輔臣叛河東失守士宏以兵集當謀帥言於巡撫謂恢復河東非用河西兵不可用河西兵非責之提督張勇不可疏入授勇靖逆將軍節制諸鎮復蘭州士宏贊畫功爲多署甘肅按察使按失守官吏罪務平允寧夏兵叛殺提督陳福調寧夏道嚴守禦安反側免衛所逋糧七萬五千石康熙十六年寇平以功進布政使參議母老乞歸家居幾三十年卒年八十士宏備兵甘山時取晉辛憲英語軍旅之間可以濟者惟仁與恕因以名其堂

多宏安字君修直隸阜城人順治五年選拔貢生康熙初授廣東靈山知縣兵後荒殘居無衙舍宏安請免積年逋賦招撫流移捐給牛種民得安耕稼葺城垣創學宮繕官廨捕除盜賊靈山大治士民刊石紀其績七年遷奉天承德知縣旗民抗法者送部懲治皆懾服十年擢陝西延安靖邊同知十六年補江南淮安山盱河務同知時高堰長隄潰決淮水注寶應高郵不復出清口敵黃黃水直注裏河運道淤淺復隨准入堰無由會清口下雲梯關入海近海口盡淤

墊宏安與河督靳輔籌策築高堰束淮敵黃治爛泥淺諸故道導清水入裏河運道乃通修築兩岸及清口清江大閘與淮工相表裏清河達雲梯關數百里葭葦榛蕪壅塞故道用以水攻沙法塞周橋高澗諸閘使清淮無旁洩蓄全力攻積沙十七年大雨淮盛漲與黃並入海治淮治黃治運並收成效十九年擢淮安知府二十年擢淮揚道二十四年擢安徽按察使時方議浚下河治高堰宏安入覲疏陳高堰宜急治無論下河開浚與否治堰法砌石先安地釘湖底水深費帑甚繁如用板若掃水勢蕩掣尤易摧殘惟密釘排椿內實以碎石庶可敵風浪省金錢十餘年後黃河刷深則湖河水俱卑高堰既固下河亦漸就理二十八年遷江西布政使乞歸後值黃運兩河潰溢起用宏安會病卒祀靈山名宦修國聘字君莘奉天人以廕生補吏部筆帖式康熙十年授江南碭山知縣縣當黃河衝研求治河方略擢歸仁隄同知調宿桃同知擢貴州平遠知府河督靳輔疏留任十餘年倚如左右手塞楊家莊蕭家渡決口建朱家堂溫家廟二石壩浚白洋引河九道築黃河南北兩岸隄浚中河靡役不從久之擢

山東濟寧道副使道地爲漕運樞紐恤夫役減苛稅除冗費能舉其職復調監督高堰工程三十八年卒於官

王繻字慎夫河南睢州人少學於湯斌康熙二十五年以歲貢生授直隸東明知縣糧賦多欺隱易甲長大戶使族長督之飛灑不行流亡來歸民間養官馬爲累力除之撫盜魁責以緝捕盜絕跡逃人誣禁良民雪之民有繼妻素淫欲併亂前妻女不從戕之死繻謂母道絕當故殺妻前夫子律論斬報可因著爲例母憂去服闋補獲鹿治驛有法民不累於供億內遷戶部員外郎擢郎中三十八年出爲江南糧儲道道舊有倉規銀鉅萬繻一擯勿取將徵漕扁舟行縣懲其濫收者至宜興宜興民曰吾民四十年不見繻道今飛來耶號曰飛糧道道庫歲收銀八十五萬兩爲修船及弁丁運費連丁預支行糧例扣月息丁益困繻悉罷之四十年擢江蘇按察使治獄仁恕多所平反宿州生携妻子出客授妻兄女來視居數日妻子並中毒死妻兄素有隙疑其女置毒告官被刑誣服繻疑之問其室來往復何人得十二歲學徒長師嚴置礮食中狀事乃白無

錫民毆攻皮匠匠死僧與民仇證爲鬪毆殺繙察鬪毆日月在保辜限外詰曰傷重何不醫出醫方則匠死於傷寒僧乃服上南巡入覲顧宋犖曰朕聞繙督糧時官聲甚好時繙已病遣御醫視之賜德里雅噶藥一器溫旨慰諭復賜御書繙曰按察任大責重臥治即辜恩引疾歸年甫五十久之卒於家田呈瑞字介璞山西汾陽人康熙中仕爲中書舍人出襄南河事有隄當水衝曰此隄一壞萬家其魚矣土隄易修易敗宜更以石家素豐山私錢成之以功擢大名道未之任調陝西臨洮道遇饑治賑策馬行郡縣山谷間豪右胥吏不敢爲奸弊呈瑞念救荒無善策於蘭州西石佛灣鑿渠教民造水車引以溉田歲增粟十餘萬石民爲建生祠調浙江金衢嚴道署糧儲道徵漕積弊盡洗滌之值旱冒暑省荒感疾乞歸不得五十九年卒於官

張孟球字夔石江南長洲人康熙二十四年進士授山東昌樂知縣入爲工部主事累遷禮部郎中出督雲南學政父憂去服闋補福建糧驛道駐防軍食取給於漕上游四郡阻灘險故事征解折色官爲採置輒抑勒病商孟球於延建

產米地平價購米飢民船運省城不假吏胥諸弊盡絕地多山嶺官吏濫用驛夫孟球禁革私冒遇大徭預期發雇值終其任無擾驛者調河南糧儲道河南漕糧就衛輝水次收兌舊無倉廩又無額役運船調之他省天寒水涸糧不時至宿河干以待遇雨雪則米濕霉變又患盜竊孟球始以羨餘建倉署布政使西藏用兵調河南馬騾萬凡騾馬三需一夫剋期兩月孟球止宿郊外躬自檢閱西路近陝諸郡遣吏往督之盡除需索留難諸弊凡五十四日馬騾如數遣赴軍而民不擾擢按察使蘭陽民朱復業附白蓮教自稱明裔煽惑數縣孟球檄杞縣知縣甯君佐馳往捕治盡獲其黨上命尙書張廷樞往按從孟球議誅其與逆謀者愚民被誘悉釋之浙川營兵博知縣崔錫執而罪之兵譁執南陽知府沈淵衆辱之總兵高成不能治時巡撫張聖佐坐譴孟球護巡撫曰南陽地連襄鄖急則鉅而走險事未可知密令附近諸縣嚴守禦諭止誅首惡自首免罪得倡亂者七人誅之不數日而事定康熙末乞歸不復出乾隆初卒年八十

論曰官監司卓卓有名氏即平進至督撫易耳如紫綬等皆早退遂以監司終  
紫綬崎嶇兵間捍偏隅爲民保障州佐士宏勤勩重民事宏安贊治河繻善斷  
獄孟球能應變使得爲督撫其績效當有大於是者時方承平仕得行其意知  
止知足必有說以自處矣

清史稿

列傳七十三

王揆

字 爽 清 吳 興

勞之辨

朱天保

陶彝

字 允 坤 廣 西 臨 桂

高 錫 麟 廣 西 臨 桂

高 怡 方 廣 西 臨 桂

趙 成 龍 廣 西 臨 桂

王 允 升 廣 西 臨 桂

陳 允 升 廣 西 臨 桂

王揆字藻儒江南太倉人明大學士錫爵係康熙九年進士選庶吉士授編修  
 爲掌院學士熊賜履所器遷左贊善充日講起居注官以病告八年起右贊善  
 提督浙江學政嚴剔積弊所拔多宿學寒峻龍泉知縣茅國璽以印揭薦武童  
 揆疏劾國璽坐譴別疏陳剔除積弊報聞累遷侍讀學士三十年超擢內閣學  
 士三十三年遷戶部侍郎直經筵三十八年調吏部禁革臨選駁查臨聖買籤  
 諸弊銓政以肅借尙書范承勳王鴻緒督修高家堰河工四十三年擢刑部尙  
 書刑部奏讞無漢字供狀揆言本朝官制兼設滿漢欲其彼此參詳今獄詞不  
 錄漢語是非曲直漢司官何由知之若隨聲畫諾幾成虛設嗣後定讞當滿漢



稿並具詔報可著爲令累厯工兵禮諸部務總紀綱持大體五十一年授文淵閣大學士兼禮部尙書直經筵如故五十二年典會試其冬以疾疏辭閣務溫旨慰留越年春疾愈仍入直孝惠章皇后附太廟議者欲附於孝康章皇后之次揆曰孝康章皇后雖母以子貴然孝惠章皇后章皇帝嫡配也上聖孝格天曩者太皇太后附廟時不以躋孝端文皇后之上今肯以孝康章皇后躋孝惠章皇后上乎禮部不從上果以爲非令改正時上春秋高皇太子允禔既廢儲位未定揆年七十餘自念受恩深又以其祖錫爵在明神宗朝以建儲事受惡名欲幹其蠱五十六年密奏請建儲疏入留中是年冬御史陳嘉猷等八人復以爲言上不悅遂并發揆疏命內閣議處忌揆者欲置重典揆止宮門外不敢入上顧左右問王揆何在李光地奏揆待罪宮門上曰王揆言甚是但不宜令御史同奏蹈明季惡習汝等票擬處分太重可速召其來揆聞命趨入免冠謝上招揆跪御榻前語良久祕人不能知六十年春羣臣請賀萬壽上勿許揆復疏前事請釋二阿哥語加激切既而御史陶彝等十二人連名入奏上疑出揆

意大怒召諸王大臣降旨責挾植黨希榮且謂錫爵在明神宗時力奏建儲泰昌在位未及數月天啟庸懦天下大亂至愍帝而不能守明之亡錫爵不能辭其罪挾以朕爲神宗乎朕初無誅大臣之意大臣自取其死朕亦無如何令王大臣傳旨詰挾令回奏時舉朝失色無敢與筆硯者挾就宮門階石上裂紙以唾濡墨奏言臣伏見宋仁宗爲一代賢君而晚年立儲猶豫其時名臣如范鎮包拯等皆交章切諫鬚髮爲白臣愚信書太篤妄思效法古人實未嘗妄嗾臺臣共爲此奏奏上越五日詔緩議罪與諸御史俱赴西陲軍前效力因挾年老責其子奕清代往爲父贖罪先是挾嘗密奏請減蘇松浮糧言至剴切疏久留中至是忤旨乃與建儲奏疏一並擲還是年冬上自熱河還京師挾迎駕石槽上望見遣內侍慰問六十一年元日諸大臣表賀未列挾名上發表命列名以進翌日賜宴太和殿再召見西煖閣賜坐慰諭有加尋起原官視事如故雍正元年以老乞休世宗降旨褒嘉以原官致仕仍留京師備顧問三年上諭閣臣云王挾向人言曾在聖祖前奏免蘇松浮糧未蒙允行朕查閱宮中並無此奏

因責挾藉事沽名並涉其子奕清奕鴻附年羹堯目爲姦巧乃遣奕鴻與奕清同在軍前效力六年拔卒年八十四乾隆二年奕清始請卹於朝賜祭葬如制奕清字幼芬康熙三十年進士選庶吉士歷官詹事代父赴軍歷駐忒斯阿達拖羅海奕清體廩善病處之晏然雍正四年命赴阿爾泰坐臺又十年乾隆元年召還仍以詹事管少詹事乞假葬父尋卒奕鴻字樹先康熙四十八年進士授戶部主事歷湖南驛鹽糧儲道奕清赴軍奕鴻盡斥其產與俱後命赴烏里雅蘇臺效力居邊十年與奕清同釋還官四川川東道引疾歸卒

勞之辨字書升浙江石門人康熙三年進士選庶吉士授戶部主事遷禮部郎中出爲山東提學道僉事報滿左都御史魏象樞特疏薦之遷貴州糧驛道參議師方下雲南羽書旁午之辨安設驛馬以利塘報復以軍米運自湖南苦累夫役白大府停運就地採購供億無愆二十四年擢通政使參議遷兵部督捕理事官連遭親喪服闋起故官洊擢左副都御史數有建白四十七年皇太子允禔既廢上日夕憂懣既有復儲意王大臣合疏保奏命留中旋諭廷臣俟廢

太子疾瘳教養有成朕自有旨諸王大臣不得多瀆十二月之辨密奏曰皇上之於皇太子分則君臣親則父子皇太子初以疾獲戾今疾已平復孝友之本懷固山至性肅雍之儀表久繫羣心乞速渙新綸收回成詔敕部擇吉早正東宮布告中外俾天下曉然知聖人舉動仁至義盡大公無私事莫有重於此者今八荒清晏一統車書值星紀初週光華復旦七廟將行大禋萬國於以朝正皇上以孝慈治天下方且稱壽母萬年之觴集麟趾繁昌之慶而願使前星虛位震子未甯聖心得無有遺憾乎臣年已七十報主之日無多知無不言統望乾斷速行自此以往皇上待皇太子與諸皇子尤願均之以恩範之以禮則宜君宜王之美不難上嬪成周遠超百代至萬不得已而裁之以法則非臣之所敢言也疏入上不懌斥爲奸詭命奪官逮赴刑部笞四十遂回原籍五十二年赴京祝萬壽復原秩逾年卒於家

朱天保字九如滿洲鎮白旗人兵部侍郎朱都訥子康熙五十二年進士選庶吉士授檢討五十六年典山東鄉試五十七年正月疏請復立二阿哥允初爲

皇太子時允祔廢已久儲位未定只勒允禩覲得立揆敘王鴻緒等左右之欲陰害允祔朱天保憂之具疏上略曰二阿哥雖以疾廢然其過失良由習於驕抗左右小人誘導之故若遺碩儒名臣爲之羽翼左右佞幸盡皆罷斥則潛德日彰猶可復問安侍膳之歡儲位重大未可移置如基恐有藩臣傍爲覬覦則天家骨肉之禍有不可勝言者疏成以父在慮同禍徘徊未即上朱都訥察其情趣之入告時上方幸湯山朱天保早出德勝門羣鴉阻馬前朱天保揮之去疏上上歎歎久之阿靈阿允禩黨也媒孽之曰朱天保爲異日希寵地上怒於行宮御門召問曰爾云二阿哥仁孝何由知之朱天保以聞父語對上曰爾父在官時二阿哥本無疾學問弓馬皆可觀後得瘋疾舉動乖張嘗立朕前辱罵徐元夢於伯叔之子往往以不可道之言肆詈爾知之乎爾又云二阿哥聖而益聖賢而益賢爾從何而知朱天保亦以父聞之守者對詰其姓名不能答上曰朕以爾陳奏此大事遣人傳問或將爾言遺漏故親訊爾爾無知稚子數語即窮必有同謀者朱天保對父與婿戴保同謀遂逮朱都訥戴保上復御門召

問曰二阿哥因病拘禁朕猶望其痊愈故復釋放父子相見教訓不悛始復拘禁二阿哥以礮水作書與普奇屬其保舉爲大將軍並謂齊世札拉克圖皆當爲將軍朕遣內侍往詢自承爲親筆此事爾知之否朱都訥自稱妄奏應萬死上曰爾奏引戾太子爲比戾太子父子間隔朕於二阿哥常遣內監往視賜食賜物今二阿哥顏貌豐滿其子七八人朕常留養宮中何得比戾太子爾又稱二阿哥爲費揚古陷害費揚古乃功臣病篤時朕親臨視沒後遣二阿哥往奠爾何得妄言爾希僥倖取大富貴以朕有疾必不親訊今爾始知當死乎辭連朱都訥婚常寶及金寶齊世萃泰等並逮訊議罪朱天保戴保皆坐斬朱都訥與常寶金寶皆免死荷校齊世拘禁萃泰奪官

陶彝順天大興人康熙三十九年進士授戶部主事再遷郎中考選廣西道御史巡視兩浙鹽政六十年三月彝與同官任坪范長發鄒圖雲陳嘉猷王允晉李允符范允鎬高玠高怡趙成穰孫紹曾合疏奏曰皇上深恩厚德浹洽人心茲逢六十年景運方新普天率土歡欣鼓舞而建儲一事尤爲鉅典懇獨斷宸

衷早定儲位疏入下內閣時大學士王掾正密疏請建儲後數日彝等疏又上上震怒斥掾植黨希榮於是王大臣奏請奪掾及諸御史官從重治罪越日諭廷臣曰王掾及御史陶彝等妄行陳奏俱稱爲國爲君今西陲用兵爲人臣者正宜汲此朝食可暫緩議罰如八旗滿洲文官例俱委署額外章京遣往軍前效力贖罪雍正四年世宗以諸御史不諳國體心本無他詔釋歸以原職休致還籍坪字坦公山東高密人康熙三十年進士自刑部郎中考選山西道御史轉掌陝西道赴軍駐忒斯河大漠荒寒盛夏冰雪坪處之怡然及歸閉戶讀書終老於家長發字廷舒浙江秀水人康熙三十三年進士授南城知縣行取禮部主事考選廣西道御史轉掌浙江道遣戍予額外主事銜隨都統圖臘赴征西將軍營還駐歸化城後命赴察漢新臺歸以原職休致圖雲字偉南江西南城人康熙三十六年進士授大竹知縣行取禮部主事考選河南道御史轉掌山東道巡視東城嘉猷字訓叔江南溧陽人康熙三十九年進士自吏部員外郎考選山西道御史五十六年王掾密請建儲未幾嘉猷與同官八人亦合疏

陳請上疑之挾幾獲罪事具挾傳至是嘉猷復與林等申請獲咎允晉直隸清苑人康熙四十五年進士自戶部員外郎考選陝西道御史允符字揆山浙江嘉善人康熙二十六年舉人授什邡知縣行取江西道御史允鎬字用賓浙江錢塘人康熙三十九年進士授安平知縣行取工部主事考選山東道御史琬字荆襄河南柘城人康熙二十七年進士自禮部郎中考選廣東道御史巡視東城謫戍忒斯軍營運糧西藏居塞上六年著出塞集備言屯戍之苦釋歸終於家怡字仲友浙江武康人康熙二十七年進士授長洲知縣善聽訟吏胥憚之尙書韓英怡帥也其姻黨繫獄以英故請恕怡怒杖之遷鄞州知州行取工部主事考選山東道御史謫戍時年逾六十以原職釋歸成穰字德培江南吳縣人康熙四十七年舉人授內閣中書累遷兵部郎中考選福建道御史紹曾字二乾浙江山陰人康熙二十五年舉人授開縣知縣行取戶部主事授四川道御史赴軍駐歸化城地當孔道故事徭役供張取給於成員紹曾清介無餘資困甚迨釋還卒於途又有邵瑤亦以疏請建儲獲罪瑤字璣亭江南無錫人



自拔貢生授茂城知縣行取工部主事授江南道御史掌登聞院巡視北城六十年遣戍軍前時同謫者十三人圖雲允符成璫瑯皆死於塞外而給事中劉堂御史柴謙吳鎬程鑣續以言事謫同時釋還仍爲十三人世稱十三言官堂彭澤人謙仁和人鎬漢陽人鑣錢塘人

論曰理密親王在儲位久未聞顯有失德而終遭廢黜聖祖手詔若有深痛鉅惡至不可言者夫以聖祖之仁明而不克全監撫之重終父子之恩諉人罔極靡所不至甚矣揆力主復故聖祖雖深罪之固諒其無他心勞之辨諫於初廢大臣拜杖已非故事朱天保爭於再黜遂以誅死罪及其親一則但責其沽名一則深疑其受指故譴有重輕歟葬等但坐謫戍已爲寬典拳拳效忠固人臣之義也

清史稿

列傳七十四

佟國維

馬齊

子富子良子保子衡子武

阿靈阿

子阿爾松

揆敘

鄂倫岱

佟國維滿洲鑲黃旗人佟國賴次子孝康章皇后幼弟孝懿仁皇后父也順治間授一等侍衛康熙九年授內大臣吳三桂反子應熊以額駙居京師謀爲亂以紅帽爲號國維發其事命率侍衛三十人捕治獲十餘人械送刑部誅之二十一年授領侍衛內大臣議政大臣二十八年推孝懿仁皇后恩封一等公二十九年師征噶爾丹命參贊大將軍裕親王軍務次烏蘭布通與兄都統國綱並率左翼兵進戰國綱戰沒國維自山腰出賊後擊之潰遁師還以未窮追部議當奪官命罷議政大臣鐫四級留任三十五年從上征噶爾丹出獨石口以駝運糧遲請罪上貫之三十六年復從上征噶爾丹噶爾丹竄死敘功還所鐫級四十四年以老解任四十七年皇太子允禔以病廢幽禁上鬱怒成疾國維

奏皇上治事精明斷無錯誤此事於聖躬關係甚大請度日後若易於措置祈速賜睿斷若難於措置亦祈速賜睿斷總之將原定意指熟慮施行爲是上命諸大臣保奏諸皇子中孰可爲皇太子者諸大臣舉皇子允禩上愈不懌旋以皇太子病愈命釋之四十八年正月召諸大臣詰孰先舉允禩實出大學士馬齊上召國維舉國維前奏語問爾旣解任事與爾無與乃先衆陳奏何意國維對臣雖解任蒙皇上命爲國舅冀聖躬速愈故請速定其事上曰將來措置難易至時自知之人其可懷私而妄言乎次日復諭曰爾每言祝天求佛願皇上萬歲嗣後惟深念朕躬謂諸皇子皆吾君之子不有所依附而陷害其餘是即俾朕易於措置也閱月上已定復立允禩爲皇太子又諭曰爾乃國舅又爲大臣皇太子前染風疾朕爲國家計安可不行拘執後知爲人鎖壓調治全愈又安可不行釋放朕拘執皇太子時並無他意不知爾肆出大言激烈陳奏果何心也諸大臣聞爾言衆皆恐懼遂欲立允禩爲皇太子列名保奏朕臨御已久安享太平並無所謂難措置者臣庶亦各安逸得所今因爾言羣小復肆爲妄

語諸臣俱終日憂慮若無生路此事關係甚重爾既有此奏必有確見其何以令朕及皇太子諸皇子不致殷憂衆心亦可定其明白陳奏國維引罪請誅戮上復諭曰朕特爲安撫羣臣非欲有所誅戮爾初陳奏衆方贊爾謂如此方可謂國家大臣今爾情狀畢露人將謂爾爲何如人朕斷不加爾誅戮爾其無懼但不可卸責於朕觀爾言迷妄其亦爲人鎮壓歟五十八年卒賜祭葬雍正元年贈太傅諡端純世宗手書仁孝勤恪勝命表於墓道子隆科多自有傳

馬齊富察氏滿洲鑲黃旗人米斯翰子由廕生授工部員外郎歷郎中遷內閣侍讀學士康熙二十四年出爲山西布政使擢巡撫馬齊入覲上褒其居官勤慎勉以始終如一久之上命九卿舉督撫清廉如于成龍者以馬齊及范成勳姚締虞對尋命偕成龍開音布往按湖廣巡撫張汧貪黷狀初命侍郎色楞額往按上荆南道祖澤深並令察汧色楞額曲庇不以實陳馬齊與成龍覆按具得汧澤深貪墨狀並色楞額論罪如律二十七年遷左都御史時俄羅斯遣使請定界詔遣大臣往議馬齊疏言俄羅斯侵據嶺土我師困之於雅克薩城本

可立時勦滅皇上寬容不忍加誅今悔罪求和特遣大臣往議垂之史冊關係甚鉅其檔案宜兼書漢字使臣并參用漢員詔如議行尋命偕尙書張玉書等勘閱河工二十九年列議政大臣都御史與議政自馬齊始尋遷兵部尙書時喀爾喀諸部避噶爾丹侵掠舉族內嚮詔沿邊安插命馬齊偕侍郎圖布等先期檄左右翼部長至上都河額爾屯河兩界以待上出塞喀爾喀諸部朝行在定諸王貝子公等爵秩牧地烏珠穆沁台吉車根等叛附噶爾丹命馬齊往按寅諸法調戶部尙書三十年上親征噶爾丹命馬齊檄喀喇沁翁牛特兵備戰還京師兼理藩院尙書噶爾丹旋敗遁詔來春復親出塞命先期往甯夏安置驛站三十八年授武英殿大學士賜御書永世翼戴榜四十七年冬皇太子允礽既廢儲位未定修國維奏請速斷上召滿漢文武諸大臣集暢春園議諸皇子中孰可爲皇太子者上意在復立皇太子而諸皇子中貝勒允禩覬爲皇太子最力諸大臣揆敘王鴻緒及修國綱子鄂倫岱等爲之羽翼集議日馬齊先至張玉書後入問衆意誰屬馬齊言衆有欲舉八阿哥者俄上命馬齊毋預議

馬齊避去阿靈阿等書八字密示諸大臣諸大臣遂以允禩名上上不憚明年正月召諸大臣問其日先舉允禩者爲誰羣臣莫敢對上嚴詰羣指都統巴璉岱上曰是必佟國維馬齊意也馬齊奏辨巴璉岱言漢大臣先舉上以問大學士張玉書玉書乃直舉馬齊語以對上曰馬齊素謬亂如此大事尙懷私意謀立允禩豈非爲異日恣肆專行計耶馬齊復力辨辭窮先出翌日上諭廷臣曰馬齊效川久朕意欲保全之昨乃拂袖而出人臣作威福如此罪不可赦遂執馬齊及其弟馬武李榮保下獄王大臣議馬齊斬馬武李榮保坐罪有差盡奪其族人官上不忍誅命以馬齊付允禩嚴錮李榮保馬武並奪官四十九年俄羅斯來互市上念馬齊習邊事令董其事李榮保馬武皆復起尋命馬齊署內務府總管五十五年復授武英殿大學士世宗即位降敕褒諭予一等阿達哈哈番尋命襲其祖哈什屯一等阿思哈尼哈番進二等伯加太子太保雍正元年改保和殿進太保三年復降詔褒其忠誠加拜他喇布勒哈番以其子富良襲十三年引疾乞罷許致仕乾隆四年病篤高宗諭謂馬齊歷相三朝年逾大

重舉朝大臣未有及者命和親王及皇長子視疾尋卒年八十八贈太傅諡文穆子富興襲爵坐事黜以富良襲進一等伯十五年加封號曰敦惠富良自散秩大臣授鑾儀衛鑾儀使累遷西安將軍兼領侍衛內大臣卒諡恭勤馬武馬齊弟初授侍衛兼管佐領累擢鑲白旗漢軍副都統因馬齊得罪奪官旋起內務府總管遷鑲白旗蒙古都統世宗卽位授領侍衛內大臣雍正四年卒命視伯爵賜卹授三等阿達哈哈番賜祭葬諡勤恪馬武子保祝初授侍衛累遷直隸提督以病解任起正紅旗蒙古都統卒諡恭簡

阿靈阿鈕祜祿氏滿洲鑲黃旗人遇必隆第五子初任侍衛兼佐領康熙二十五年襲一等公授散秩大臣擢鑲黃旗滿洲都統阿靈阿女兄上冊爲貴妃貴妃薨殯朝陽門外阿靈阿舉家在殯所持喪與兄法喀素不睦欲致之死乃播蜚語誣法喀法喀以聞上震怒奪阿靈阿職仍留公爵尋授一等侍衛累遷正藍旗蒙古都統擢領侍衛內大臣理藩院尙書四十九年與揆敘王鴻緒等密議舉允禩爲皇太子上以馬齊示意諸大臣予嚴譴不復窮治興大獄五十五

年卒子阿爾松阿降襲二等公擢領侍衛內大臣刑部尙書雍正二年世宗召諸大臣諭曰本朝大臣中居心奸險結黨營私惟阿靈阿揆敘爲甚當年二阿哥之廢斷自聖衷豈因臣下蜚語遂行廢立乃阿靈阿揆敘攘爲己力要結允禩等造作無稽之言轉相傳播致皇考憤懣莫可究詰阿靈阿子阿爾松阿柔奸狡猾甚於其父令奪官遣往奉天守其祖墓並將阿靈阿墓碑改鐫不臣不弟暴悍貪庸阿靈阿之墓以正其罪四年命誅阿爾松阿妻子沒入官乾隆元年以阿靈阿墓碑立祖塋前墓已遷而碑尙存命去之妻子釋令歸旗

揆敘字凱功納喇氏滿洲正黃旗人大學士明珠子康熙三十五年自二等侍衛授翰林院侍讀充日講起居注官累擢翰林院掌院學士兼禮部侍郎奉使冊封朝鮮王妃尋充經筵講官教習庶吉士遷工部侍郎初明珠柄政勢焰薰灼大治園亭賓客滿門下揆敘交游既廣尤工結納素與允禩相結皇太子旣廢揆敘與阿靈阿等播蜚語言皇太子諸失德狀杜其復立四十七年冬上召滿漢大臣問諸皇子中就可爲皇太子者揆敘及阿靈阿鄂倫岱王鴻緒等私



與諸大臣通消息諸大臣遂舉允祺事具馬齊傳五十一年遷左都御史仍掌翰林院事疏言近聞外省塘報故抵拾大小事件名曰小報駭人耳目請飭嚴禁庶好事不端之人知所做懼詔允行五十六年卒諡文端雍正二年發授敘及阿靈阿罪狀追奪授敘官削諡墓碑改鑄不忠不孝陰險柔佞授敘之墓

鄂倫岱滿洲鑲黃旗人佟國綱長子初任一等侍衛出爲廣州駐防副都統康熙二十九年擢鑲黃旗漢軍都統襲一等公三十五年上親征噶爾丹鄂倫岱領漢軍兩旗火器營出古北口扈蹕北巡塞外三十六年擢領侍衛內大臣坐事降一等侍衛尋授散秩大臣四十六年復授領侍衛內大臣五十九年命出邊管蒙古驛站世宗立召還授正藍旗漢軍都統雍正三年諭曰鄂倫岱與阿靈阿皆黨於允祺當日允祺得罪皇考時方駐蹕遙亭命執允祺門下宦者刑訊具言鄂倫岱等黨附狀鄂倫岱等色變不敢置辨四十九年春皇考自朔州回鑾途中責鄂倫岱等結黨鄂倫岱悍然不顧又從幸熱河皇考不豫鄂倫岱日率乾清門侍衛較射游戲皇考於行園時數其罪命侍衛鞭撻之鄂倫岱頑

悍怨望雖置極典不足蔽辜朕念爲皇祖妣皇妣之戚父又陳亡不忍加誅令往奉天與阿爾松阿同居四年與阿爾松阿並誅仍諭不籍其家不沒其妻子子補熙自廢生授理藩院員外郎襲國綱拜他喇布勒哈番世職官至綏遠城將軍卒諡溫僖

論曰理密親王既廢自諸皇子允禩允禟輩及諸大臣多謀擁允禩聖祖終不許誠以儲位至重非可以覬覦攘奪而致也修國維陳奏激切意若不利於故皇太子語不及允禩而意有所在馬齊遂示意諸大臣然二人者皆非出本心聖祖諒之世宗亦諒之故能恩禮勿替賞延於後嗣若阿靈阿父子揆敘鄂倫岱王鴻緒固擁允禩最力者世宗既譴允禩諸臣生者被重誅死者蒙惡名將安所逃罪鴻緒又坐與徐乾學等比被論事別見故不著於此篇

清史稿

列傳七十五

鄂爾泰

字仲和 蒙古 內務府 鑲黃旗 人

張廷玉

字若虛 安徽 桐城 人

鄂爾泰字毅庵西林覺羅氏滿洲鑲藍旗人世居汪欽國初有屯泰者以七村附太祖授牛錄額貢子圖們事太宗從戰大凌河擊明將張理陳沒授備禦世職雍正初祀昭忠祠鄂爾泰其曾孫也康熙三十八年舉人四十二年襲佐領授三等侍衛從聖祖獵和詩稱旨五十五年遷內務府員外郎世宗在藩邸偶有所屬鄂爾泰拒之世宗即位召曰汝爲郎官拒皇子其執法甚堅深慰諭之雍正元年充雲南鄉試考官特擢江蘇布政使於解中建春風亭禮致能文士錄其詩文爲南都耆獻集以應得公使銀買穀三萬三千四百石有奇分貯蘇松常三府備賑貸察太湖水利擬疏下游吳淞白茆役未舉三年遷廣西巡撫甫上官調雲南以巡撫治總督事貴州種家苗爲亂二十餘年巡撫石禮哈提督馬會伯請用兵上未即許巡撫何世璜疏言種家苗樂箭鋸利地勢險阻用

兵不易上卽命世璠招撫久未定詔諮鄂爾泰四年春疏言雲貴大患無如苗蠻欲安民必制夷欲制夷必改土歸流而苗疆多與鄰省相錯卽如東川烏蒙鎮雄皆四川土府東川距雲南四百餘里去冬烏蒙攻掠東川滇兵擊退而川省令箭方至烏蒙距雲南省城亦僅六百餘里錢糧不過三百餘兩取於下者百倍一年四小派三年一大派小派計錢大派計兩土司娶子婦土民三載不敢婚土民被殺親族尙出犂刀數十金終身不見天日東川雖已改流尙爲土目盤據文武長寓省城膏腴四百里無人敢掣若改隸雲南俾臣得相機改流可設三府一鎮此事連四川者也廣西土府州縣峒寨等一百五十餘員分隸南甯太平思恩慶遠四府其爲邊患自泗城土府外皆土目橫於土司黔粵以牂牁江爲界而粵屬西隆州與黔屬普安州越江互相斗入苗寨寥闊將吏推諉應以江北歸黔江南歸粵增州設營形格勢禁此事連廣西者也滇邊西南界以瀾滄江江外爲車里緬甸老撾諸境其江內鎮沅威遠元江新平普洱茶山諸夷巢穴深邃出沒魯魁哀牢間無事近患腹心有事遠通外國論者謂江

外宜土不宜流江內宜流不宜土此雲南宜治之邊夷也貴州土司向無鉗束羣苗之責苗患甚於土司苗疆四圍幾三千餘里千三百餘寨古州踞其中羣寨環其外左有清江可北達楚右有都江可南通粵蟠據梗隔遂成化外如欲開江路通黔粵非勦兵深入徧加勦撫不可此貴州宜治之邊夷也臣思前明流土之分原因煙瘴新疆未習風土故因地制宜使之鄉導彈壓今歷數百載以夷治夷即以盜治盜苗裸無追職抵命之憂土司無革職削地之罰直至事上聞行賄詳結上司亦不深求以爲鎮靜邊民無所控訴若不剷蔓塞源縱兵刑財賦事事整理皆非治本改流之法計擒爲上兵勦次之令其自首爲上勦次之惟勦夷必練兵練兵必選將誠能賞罰嚴明將士用命先治內後攘外實邊防百世之利疏入上深然之會石禮哈疏報遣兵擊破谷隆長寨者貢羊城重諸隘擒其渠阿革阿給及諸苗之從爲亂者上命交鄂爾泰按讞五月鄂爾泰遣兵三道入一自谷隆一自焦山一自馬落孔破三十六寨降二十一寨撫苗民五百餘戶二千餘口察出荒熟田地三萬畝又以鎮遠土知府刁澣澍

益土知州安於藩素凶詐計擒之者樂甸土司刁聯斗乞免死改土歸流鄂爾泰疏報種家苗悉定上嘉其成功速令議敘旋條上經理種苗諸事報可十月  
寅除雲貴總督四川烏蒙土司祿萬鍾爲亂侵東川鄂爾泰請以東川改隸雲  
南上從之仍命會四川總督岳鍾琪按治招其渠祿鼎坤出降鄂爾泰令鼎坤  
招萬鍾數往不就撫乃檄總兵劉起元率師討之破其所居寨萬鍾走匿鎮雄  
土司隴慶侯所五年萬鍾詣鍾琪降慶侯亦詣鍾琪請改土歸流上命鍾琪以  
萬鍾慶侯交鄂爾泰按讞敘功授世職拜他喇布勒哈番三月鎮沅徠刁如珍  
等戕官焚掠遣兵討平之獲汝珍泗城土知府岑映宸縱其衆出掠又發兵屯  
者相立七營鄂爾泰疏劾令諸道兵候檄進討映宸乞免死存祀改土歸流鄂  
爾泰請映宸送浙江原籍留其弟映翰奉祀七月發兵與湖北師會討定謬沖  
花苗獲其渠降其餘衆威遠徠札鐵匠等新平徠李百叠等應如珍爲亂九月  
鄂爾泰檄臨元總兵孫宏本率師討之獲札鐵匠降李百叠威遠新平皆定十  
一月招降長寨後路苗百八十四寨編戶口定額賦得旨嘉獎進世職一等阿

達哈哈番十二月攻破雲南裸窩泥種取六茶山地千餘里劃界建城置官吏雲南南徼地與安南接前總督高其倬疏言安南國界應屬內地者百二十里請以賂咒河爲界安南國王黎維禔奏辦上命鄂爾泰清察鄂爾泰請與地八十里於鉛廠山下小河內四十里立界上從之敕諭安南六年維禔表謝上嘉其知禮命復與四十里旋討擒東川法戛土目祿天佑則補土目祿世豪按治米貼土日程永孝論斬永孝妻陸氏結裸獾爲亂檄總兵張耀祖討之攻克門坎山師入獲陸氏米貼平廣西八達寨獵顏光色等爲亂提督田峻不能討鄂爾泰遣兵往獵殺光色以降上命鄂爾泰總督雲貴廣西三省發帑十萬犒師旋又撫貴州拜克猛長寨古羊等生苗百四十五寨十月萬壽節雲南卿雲見鄂爾泰疏聞七年正月命超授三等阿思哈尼哈番雲貴兩省巡撫提督總兵文知縣武千總以上皆加級三月令按察使張廣泗率師攻貴州丹江雞溝生苗破其寨種人悉降上下九股清水江古州諸地以次定下部議敘鄂爾泰疏辭而乞予曾祖圖們封典俾昭忠祠位得改書贈官列大臣之末上允其請仍

命議敘七月招安順高耀等寨生苗及獵狝諸種人內附十月雲南趙州醴泉  
出鄂爾泰疏聞上褒鄂爾泰化民成俗格天致瑞特加少保八年五月招黎平  
都勻等寨生苗內附鄂爾泰既討定羣苗爲亂者諸土司懾軍威納土疆理其  
地置郡縣設營汛重定三省及四川界域而諸土司世守其地一旦歸版籍其  
渠誅夷遷徙皆無倖屬苗內憤吳烏蒙裸最狡悍總兵劉起元移鎮其地恣爲  
貪虐六月祿鼎坤及其族人鼎新萬福遂糾衆攻城刼殺起元及游擊江仁知  
縣賽枝大等盡戕其孥鄂爾泰疏聞請罷斥上慰諭之烏蒙既陷江外涼山下  
方阿驢江內巧家營者家海諸寨及東川祿氏諸土目皆起而應之又令則補  
以址諸寨要截江路以則以擢諸寨窺伺城邑東川境內空泥矣氏歹補阿汪  
諸寨東川境外急羅管施魯古牛畢古諸寨及武定尋甸威寧鎮雄所屬諸夷  
遠近嚮應殺塘兵劫糧運堵要隘毀橋樑所在屯聚爲亂鄂爾泰集官兵萬數  
千人土兵半之分三路進攻令總兵魏翥國攻東川哈元生攻威寧副將徐成  
貞副之參將韓勳攻鎮雄翥國師行土目祿鼎明遣行刺被創以總兵官祿代



將師進焚苗寨十三道游擊何元攻急羅箐殺三百餘降一百三十餘游擊紀龍攻者家海破寨盡殲其衆勦與苗兵遇於莫都戰一晝夜破寨四殺數百人進攻奎鄉戰三日殺二千餘元生成貞自威寧攻烏蒙射殺其渠黑寡暮來連破寨八十餘擊敗其衆數萬遂克烏蒙鄂爾泰檄提督張耀祖督諸軍分道窮搜屠殺刳腸截脰分懸崖樹間羣苗慄上獎鄂爾泰及諸將以元生成貞勦爲功首發帑犒師隴慶侯庶母二祿氏四川沙馬土婦沙氏以不從亂給誥命資銀幣於是苗疆復定鄂爾泰令於雲貴界上築橋命曰庚戌橋以年紀其績也是歲永昌邊外孟連土司請歲納廠課六百鶴慶邊外懿子請歲貢土物鄂爾泰疏聞上以邊外野夷向化命減孟連廠課之半懿子入貢犒以鹽三百斤九年疏請重定烏蒙鎮遠東川威寧營汛別疏請興雲南水利濬嵩明州楊林海開墾周圍草塘疏宜良尋甸諸水耕東城北漫海築浪穹羽河諸隄修臨安諸處工暨通粵河道皆下部議行十年召拜保和殿大學士兼兵部尙書辦理軍機事務敘定苗疆功部議進世職一等精奇尼哈番上特命授一等伯爵世

襲師討準噶爾六月命鄂爾泰督巡陝甘經略軍務九月師破敵額爾德尼昭  
鄂爾泰檄大將軍張廣泗遣兵截殺塔馬哈戈壁斷敵北遁道尋疏請屯田十  
一年六月還京師入對言準部未可驟滅用兵久敝中國無益上頗然之十三  
年台拱苗復叛上命設辦理苗疆事務處以果親王寶親王和親王鄂爾泰及  
大學士張廷玉等董其事苗患日熾焚掠黃平施秉諸地鄂爾泰以從前布置  
未協引咎請罷斥並削去伯爵上曰國家錫命之恩有功則受無功則辭古今  
通義允其請予休沐仍食俸尋命留三等阿思哈尼哈番八月世宗疾大漸鄂  
爾泰仍以大學士與莊親王允祿果親王允禮大學士張廷玉內大臣豐盛額  
訥親海望同被顧命鄂爾泰與廷玉捧御筆密詔命高宗爲皇太子俄皇太子  
傳旨命鄂爾泰等輔政世宗崩宣遺詔以鄂爾泰志秉忠貞才優經濟命他日  
配享太廟高宗即位命總理事務進一等精奇尼哈番乾隆二年十一月辭總  
理事務授軍機大臣又辭兼管兵部上不許加拜他喇布勒哈番合爲三等伯  
賜號襄勤迭主會試充領侍衛內大臣議政大臣經筵講官四年南河河道總

督高斌請開新運口河東河道總督白鍾山請復漳河故道命鄂爾泰按視尋加太保七年副都御史仲永檀以密奏留中事告鄂爾泰長子鄂容安命王大臣會鞠請奪鄂爾泰官逮問上不許十年以疾乞解任上慰留加太傅卒命遵遺詔配享太廟並祀賢良祠賜祭葬諡文端二十年內閣學士胡中藻以詩辭悖逆獲罪中藻出鄂爾泰門下鄂爾泰從子甘肅巡撫鄂昌與唱和並坐譴上追咎鄂爾泰植黨命撤出賢良祠鄂爾泰弟鄂爾奇康熙五十一年進士改庶吉士散館授編修雍正中四遷至侍郎歷工禮二部署兵部五年擢戶部尚書兼步軍統領十一年直隸總督李衛論劾壞法營私案制擾民諸狀鞠實當治罪上推鄂爾泰恩宥之十三年卒鄂爾泰子鄂容安鄂實鄂弼鄂寧鄂圻鄂謨鄂容安自有傳鄂實與高天喜同傳鄂弼初授三等侍衛遷正紅旗漢軍副都統出爲山西巡撫調陝西署西安將軍擢四川總督未上官卒賜祭葬諡勤肅鄂寧舉人初授戶部筆帖式屢以員外郎署副都統復自郎中擢禮部侍郎出爲湖北巡撫調湖南再調雲南師征緬甸雲南總督楊應琚戰失利鄂寧以實

疏聞明瑞代應琚深入戰死鄂寧劾參贊額勒登額提督譚五格逗遛失機上獎鄂寧加內大臣銜即命代明瑞爲雲貴總督尋以與參贊舒赫德合疏議撫失上指奪內大臣銜左授福建巡撫迭降藍翎侍衛卒

張廷玉字衡臣安徽桐城人大學士英次子康熙三十九年進士改庶吉士散館授檢討直南書房以憂歸服除遷洗馬歷庶子侍講學士內閣學士五十九年授刑部侍郎山東鹽販王美公等糾衆倡邪教巡撫李樹德令捕治得百五十餘人上命廷玉與都統托賴學士登德會勘戮七人戍三十五人而讞定旋調吏部世宗即位命與翰林院學士阿克敦勵廷儀應奉几筵祭告文字賜廢生視一品擢禮部尙書雍正元年復命直南書房偕左都御史朱軾充順天鄉試考官上嘉其公慎加太子太保尋兼翰林院掌院學士調戶部疏言浙江衢州江西廣信贛州毘連閩粵無藉之徒流徙失業入山種麻結棚以居號曰棚民歲月既久生息日繁其強悍者輒出剽掠請敕督撫慎選廉能州縣嚴加約束其有讀書向學膺力技勇察明考驗錄用庶生衆教訓初無歧視下督撫議

行命署大學士事四年授文淵閣大學士仍兼戶部尙書翰林院掌院學士五年進文華殿大學士六年進保和殿大學士兼吏部尙書七年加少保八年上以西北川兵命設軍機房隆宗門內以怡親王允祥廷玉及大學士蔣廷錫領其事嗣改稱辦理軍機處廷玉定規制諸臣陳奏常事用疏自通政司上下內閣擬旨要事用摺自奏事處上下軍機處擬旨親御硃筆批發自是內閣權移於軍機處大學士必充軍機大臣始得預政事日必召入對承旨平章政事參與機密廷玉周敏勤慎尤爲上所倚上偶有疾獎廷玉等翊贊功各予一等阿達哈哈番世襲廷玉請以子編修若鼐承襲十一年疏言諸行省例凡罪人重者收禁輕者取保獨刑部不論事大小人首從皆收禁累無辜請如諸行省例得分別取保刑部引律例往往刪截但用數語即承以所斷罪甚有求其彷彿比照定議者高下其手率由此起請敕都察院大理院駁正扶同草率併予處分命九卿議行大學士英祀京師賢良祠復即本籍諭祭命廷玉歸行禮並令子若鼐從弟廷璐督江蘇學政亦命來會發帑金萬爲英建祠並賜冠帶衣裘

及貂皮人參內府書籍五十二種十二月廷玉疏言行經直隸被水諸縣已予賑尚有積潦不能種麥請敕加賑一月並議以工代賑得旨允行十二年二月還京師上遣內大臣耶海望迎勞蘆溝橋賜酒膳十三年世宗疾大漸與大學士鄂爾泰等同被顧命遺詔以廷玉器量純全抒誠供職命他日配享太廟高宗卽位命總理事務予世職一等阿達哈哈番合爲三等子仍以若靄襲乾隆元年明史成表進命仍兼管翰林院事二年十一月辭總理事務加拜他喇布勒哈番特命與鄂爾泰同進三等伯賜號勤宣仍以若靄襲四年加太保尋諭本朝文臣無爵至侯伯者廷玉爲例外命自兼不必令若靄襲又諭廷玉年已過七十不必向早入朝炎暑風雪無強入十一年若靄卒上以廷玉入內廷須扶掖命次子庶吉士若澄直南書房十三年以老病乞休上諭曰卿受兩朝厚恩且奉皇考遺命配享太廟豈有從祀元臣歸田終老廷玉言宋明配享諸臣亦有乞休得請者且七十懸車古今通義上曰不然易稱見幾而作非所論於國家關休戚視君臣爲一體者使七十必令懸車何以尙有八十杖朝之典武

侯鞠躬盡瘁又何爲耶廷玉又言亮受任軍旅臣幸得優游太平未可同日而語上曰是又不然皋夔龍比易地皆然既以身任天下之重則不以艱鉅自諉亦豈得以承平自逸朕爲卿思之不獨受皇祖皇考優渥之恩不可言去即以朕十餘年眷待亦不當言去朕且不忍令卿去卿願能辭朕去耶朕謂致仕之義必古人遭逢不偶不得已之苦衷爲人臣者設預存此心必將漠視一切泛泛如秦越年至則奉身以退誰復出力爲國家治事是不可以不辨因命舉所諭宣告朝列並允廷玉解兼管吏部廷玉自是不敢言去然廷玉質老病十四年正月命如宋文彥博十日一至都堂議事四五日一入內廷備顧問是冬廷玉乞休沐養病上命解所兼領監修總裁諸職且令軍機大臣往省廷玉言受上恩不敢言去私意願得暫歸後年上南巡當於江寧迎駕上乃許廷玉致仕命待來春冰泮舟行歸里親製詩三章以賜廷玉入謝奏言蒙世宗遣命配享太廟上年奉恩諭從祀元臣不宜歸田終老恐身後不獲更蒙大典免冠叩首乞上一言爲券上意不懌然猶爲頒手詔申世宗成命並製詩示意以明劉基

乞休後仍配享爲例次日遣子若澄入謝上以廷玉不親至遂發怒命降旨詰責軍機大臣傅恒汪由敦承旨由敦爲乞恩旨未下又次日廷玉入謝上責由敦漏言降旨切責廷臣請奪廷玉官爵能配享上命削伯爵以大學士原銜休致仍許配享十五年二月皇長子定安親王薨方初祭廷玉即請南還上愈怒命以太廟配享諸臣名示廷玉命自審應否配享廷玉惶懼疏請罷配享治罪上用大學士九卿議罷廷玉配享仍免治罪又以四川學政編修朱荃坐罪荃爲廷玉姻家嘗薦舉上以責廷玉命盡繳歷年頒賜諸物二十年三月卒命仍遵世宗遺詔配享太廟賜祭葬諡文和乾隆三年上將臨雍視學舉古禮三老五更諮鄂爾泰及廷玉廷玉謂無足當此者撰議以爲不可行四十三年上撰三老五更說闕古說踏駁命勒碑辟雍五十年復見廷玉議以所論與上同命勒碑其次並題其後謂廷玉有此卓識乃未見及朕必遵皇考遺旨令其配享古所謂老而戒得朕以廷玉之戒爲戒且爲廷玉惜之終清世漢大臣配享太廟惟廷玉一人而已子若霽字晴嵐雍正十一年進士廷試世宗親定一甲三



名拆卷知爲廷玉子遣內侍就直廬宣諭廷玉堅辭乃改二甲一名授編修直南書房充軍機章京乾隆間屢遷至內閣學士若鶴工書畫內直御府所藏令題品鑒別詣益進十一年扈上西巡感疾歸卒若澄字鏡壑乾隆十年進士改庶吉士直南書房累遷至內閣學士卒若澄亦工畫亞若鶴若淳字聖泉入資授刑部主事充軍機章京再遷郎中出爲雲南澂江知府四川建昌道內擢太僕少卿五遷至侍郎歷工刑戶諸部嘉慶五年授兵部尙書調刑部七年卒贈太子少保賜祭葬諡勤恪從子若淮字樹穀雍正八年進士授兵部主事考選江西道御史擢鴻臚寺少卿六遷刑部侍郎擢左都御史上命旌卹勝朝徇節諸臣若淮請遍行採訪下大學士九卿議以爲明史外兼採各省通志專諡通諡已至千五六百人不必更行採訪若淮以老乞休上南巡屢迎謁五十年與千叟宴御書勝以賜歸又二年卒

論曰世宗初即位擢鄂爾泰於郎署不數年至總督廷玉已貳禮部內直稱旨不數年遂大拜軍機處初設職制皆廷玉所定鄂爾泰稍後委寄與相埒庶政

修舉字內又安遂乃受遺命侑大烝可謂極心膂股肱之重矣顧以在政地久  
兩家子弟賓客漸且競權勢角門戶高宗燭幾摧萌不使成朋黨之禍非二臣  
之幸歟

清史稿

列傳七十六

朱軾

徐元夢

蔣廷錫

邁柱

田從典

尹泰

子榮 高其位

白旗 趙國勛

朱軾字若瞻江西高安人康熙三十二年舉鄉試第一三十三年成進士改庶吉士散館授湖北潛江知縣潛江俗敝賦繁軾令免耗美川法必持平有鬪毆殺人獄上官改故殺軾力爭之卒莫能奪四十四年行取授刑部主事累遷郎中四十八年出督陝西學政修橫渠張子之教以知禮成性變化氣質訓士故事試冊報部科富有公使錢軾獨無坐迎誤被劾士論爲不平會有以其事聞上者上命軾畢試事五十二年擢光祿少卿歷奉天府尹通政使五十六年授浙江巡撫五十七年疏請修築海塘北岸海甯老鹽倉千三百四十丈南岸上虞夏蓋山千七百九十丈並議開中鹽淤沙復江海故道又疏言海甯沿塘皆浮沙雖長椿巨石難期保固當用水櫃法以松杉木爲櫃實碎石用爲塘根上

施巨石爲塘附塘爲坦坡亦用水櫃外砌巨石二三重高及塘之半用護塘址塘內爲河名曰備塘河居民築壩積淤應去壩濬河卽以其土培岸俱下部議行杭州南北兩關稅例由巡撫監收軾以稅口五十餘稽察匪易請委員兼理部議以杭州捕盜同知監收仍令巡撫統轄五十八年疏劾巡鹽御史哈爾金索商人賄上命尙書張廷樞學士德音按治論如律五十九年擢左都御史六十年遭父喪命在任守制疏辭上不許請從軍自效上以山陝旱災發帑五十萬命軾與光祿寺卿盧詢分往勸糴治賑軾往山西疏請令被劾司道以下出資贍饑民富民與商人出資於南省糴米暫停淮安鳳陽等關米稅饑民流徙令所在地方官安置能出資以贍者得題薦饑民羣聚易生瘟疫設廠醫治又疏言倉庾積貯有司平日侵蝕遇災復假平糴借貸煮粥爲名以少報多有名無實請敕詳察虧空少則勒限補還多則嚴究治罪至因賑動倉穀輒稱捐俸抵補俸銀有限倉穀甚多借非實借還非實還宜併清覈皆從所議行別疏請令山西各縣建社倉引泉溉田上謂社倉始於朱子僅可行於小縣鄉村若奏

爲定例官吏奉行久之與民無益山陝山多水少間有泉源亦不能暢引溉田  
軾既以爲請卽令久駐山西鼓勵試行軾自承冒昧乞寢其議上不許未幾川  
陝總督年羹堯劾西安知府徐容鳳翔知府甘文煊虧帑請特簡親信大臣會  
鞠上命軾往勘得實論如律六十一年乞假葬父歸世宗卽位召詣京師充聖  
祖實錄總裁賜第雍正元年命直南書房予其母冷氏封加吏部尙書銜尋復  
加太子太保充順天鄉試考官嘉其公慎進太子太傅二年兼吏部尙書命勘  
江浙海塘三年還奏浙江餘姚澣山鎮西至臨山衛舊土塘三道本爲民竈修  
築今民竈無力應動帑興修自臨山衛經上虞烏盆村至會稽渥海所土塘七  
千丈應以石爲基就石累土又海甯陳文港至興山土塘七百六十六丈應就  
塘加寬覆條石於巔塘外以亂石爲子塘護塘址當修砌完固至子塘處依式  
興築海鹽秦駐山至演武場石塘圯八十丈潰七十丈均補築都計工需十五  
萬有奇江南金山衛城北至上海華家角土塘六千二百餘丈內三千八百丈  
當改爲石塘上海汛頭墩至嘉定二千四百丈水勢稍緩土塘加築高厚足資

捍禦都計工需十九萬有奇下部議行拜文華殿大學士兼吏部尙書上命怡親王胤祥總理畿輔水利營田以軾副之四年請分設四局各以道員領其事二月軾遭母喪命馳驛回籍諡曰軾事母至孝但母年八十餘祿養顯揚俱無餘憾當節哀抑慟護惜此身爲國家出力賜內帑治喪敕江西巡撫俟軾至家賜祭軾奏謝乞終制上允解任仍領水利營田期八月詣京師九月軾將至遣學士何國宗副都統永福迎勞許素服終喪上以浙江風俗澆漓特設觀風整俗使軾疏言風俗澆漓莫甚於爭諍臣巡撫浙江知杭嘉湖紹四府民最好訟請增設杭嘉湖巡道而以紹興屬甯台道民間詞訟冤抑准巡道申理上從其請六年以病乞解任上手詔留之八年怡親王薨命軾總理水利營田尋兼兵部尙書署翰林院掌院學士十三年議築浙江海塘軾請往董其役上俞之敕督撫及管理塘工諸大臣咸聽節制高宗即位召還命協同總理事務予拜他喇布勒哈番世職時治獄尙刻深各省爭言開墾爲民累軾疏言四川丈量多就熟田增加錢糧廣西報部墾田數萬畝其實多係虛無因請通行丈量冀求

熟田弓口之餘以補報墾無著之數大行皇帝洞燭其弊飭停止丈量而前此虛報升科入冊輸糧小民不免苦累河南報墾亦多不實州縣田地間有未能耕種之處或因山區礮礮旋墾旋荒或因江岸河淤東坍西漲是以荒者未盡開墾墾者未盡升科至已熟之田或糧額甚輕亦由土壤礮瘠數畝不敵腴田一畝非欺隱者比不但丈量不可行卽令據實首報小民惟恐察出治罪勉強報升將來完納不前仍歸荒廢請停止丈量飭禁首報詳察見在報墾之田有不實者題請開除又疏言法吏以嚴刻爲能不問是非曲直刻意株連惟逞鍛鍊之長希著明察之號請敕督撫諭有司讞獄務虛公詳慎原情酌理協於中正刑具悉遵定制不得擅用夾棍大枷上深嘉納之乾隆元年充世宗實錄總裁九月病篤上親臨視疾軾力疾服朝服令其子扶掖迎拜戶外翌日卒遺疏略言萬事根本君心用人理財尤宜慎重君子小人公私邪正判在幾微當審察其心迹而進退之至國家經費本自有餘異日倘有言利之臣倡加賦之稅伏祈聖心乾斷永斥浮言實四海蒼生之福上震悼輟朝復親臨致奠發帑治

喪贈太傅賜祭塋謚文端軾樸誠事主純修清德負一時重望高宗初典學世宗命爲師傅設席懋勤殿行拜師禮軾以經訓進講亟稱賈董宋五子之學高宗深重之懷舊詩稱可亭朱先生可亭軾號也子必階以蔭生官至大理寺卿堪進士官至右庶子必坦舉人襲騎都尉

徐元夢字善長舒穆祿氏滿洲正白旗人康熙十二年進士改庶吉士散館授戶部主事二十二年遷中允充日講起居注官尋復遷侍講徐元夢以講學負聲譽大學士明珠欲羅致之其遷詞曹直講筵明珠嘗薦於上徐元夢以明珠方擅政不一至其門而掌院學士李光地亦好講學賢徐元夢及侍講學士德格勒亟稱於上前二人者每於上前相推獎明珠黨輩語謂與光地爲黨二十六年夏上御乾清宮召陳廷敬湯斌徐乾學耿介高士奇孟亮揆徐潮徐嘉炎熊賜瓚勵杜訥及二人入試題爲理學眞僞論方屬草有旨詰二人德格勒於文後申辨徐元夢卷末竟上閱畢於德格勒及賜瓚有所譙讓命同試者互校斌仍稱徐元夢文爲是是時斌被命輔導皇太子尋亦命徐元夢授諸皇子讀



秋上御瀛臺教諸皇子射徐元夢不能挽強上不懌責徐元夢徐元夢奏辨上益怒命朴之創遂籍其家戍其父母其夜上意解令醫爲治創翌日命授諸皇子讀如故徐元夢乞赦其父母已就道使追還冬掌院學士庫爾納奏劾德格勒私抹起居注並言與徐元夢互相標榜奪官逮下獄二十七年春獄上當德格勒勒立斬徐元夢絞上命貸徐元夢死荷校三月鞭百入辛者庫上徐察徐元夢忠誠三十二年命直上書房仍授諸皇子讀尋授內務府會計司員外郎四十年充順天鄉試考官五十年諭曰徐元夢繙譯見今無能過之授額外內閣侍讀學士五十一年充會試考官五十二年擢內閣學士歸原旗五十三年授浙江巡撫上諭之曰浙江駐防滿洲兵爾當與將軍協同訓練錢糧有虧空爾宜清理無累百姓至於川人當隨材器使不可求全賜御製詩文集及鞍馬以行五十四年疏言杭州紹興等七府旱潦成災已蒙蠲賑並截漕平糶未完額賦尙有十三萬餘兩請秋成後徵半餘俟來歲上允之又疏陳修復萬松嶺書院上賜浙水數文勝因請以數文名書院五十六年左都御史及翰林院掌

院學士缺員吏部以請上曰是當以不畏人兼學問優者任之以命徐元夢上  
諭科場積習未除命甄別任滿學政及考官不稱職者皆劾罷之五十七年遷  
工部尚書仍兼掌院學士六十年上賜以詩謂徐元夢乃同學舊翰林康熙十  
六年以前進士祇此一人世宗即位復命直上書房授諸皇子讀雍正元年命  
與大學士張鵬翮等甄別翰詹各官不稱職者勒令解退回籍大學士富甯安  
出視師命徐元夢署大學士尋復命兼署左都御史充明史總裁調戶部尚書  
四年以繙譯本章錯謬奪官命在內閣學士之列效力行走仍司繙譯八年復  
坐前在浙江失察呂留良逆書命同繙譯中書行走十三年充繙譯鄉試考官  
高宗卽位命直南書房尋受內閣學士擢刑部侍郎以衰老不能理刑名疏辭  
調禮部充世宗實錄副總裁詔輯八旗滿洲氏族通譜命與鄂爾泰福敏董其  
事復命直上書房課皇子讀乾隆元年乞休命解侍郎任加尚書銜食俸仍在  
內廷行走領諸館事二年上臨雍疏請以有子升堂配享改宰我冉求兩廡而  
進南宮适處不齊升配下大學士九卿議以有子升祀位次子夏餘寢未行復

乞休上曰徐元夢年雖逾八十未甚衰憊可量力供職四年正月召同諸大臣賦柏梁體詩尋加太子少保六年秋疾作遣太醫診視賜葭藥冬十一月疾劇上諭曰徐元夢踐履篤實言行相符歷事三朝出入禁近小心謹慎數十年如一日壽逾大耋洵屬完人命皇長子視疾疾革復遣使問所欲言徐元夢伏枕流涕曰臣受恩重心所欲言口不能盡使出呼曾孫取論語檢視良久翌日遂卒年八十七上復命和親王及皇長子奠茶酒發帑治喪贈太傅賜祭塋謚文定孫舒赫德自有傳

蔣廷錫字揚孫江南常熟人雲貴總督陳錫弟初以舉人供奉內廷康熙四十二年賜進士改庶吉士四十三年未散館卽授編修屢遷轉至內閣學士雍正元年擢禮部侍郎世宗賜詩賢之廷錫疏言國家廣養序設廩膳以興文教乃生員經年未嘗一至學宮請敕學臣通飭府州縣衛教官凡所管生員務立程課而加考校講究經史學臣於歲科考時以文藝優劣定教職賢否會典載順治九年定鄉設社學以冒濫停止請敕督撫令所屬州縣鄉堡立社學擇生員

學優行端者充社師量給廩餼鄉民子弟年十二以上二十以下有志者得入學下部議從之二年奏請續纂大清會典即命爲副總裁調戶部三年命與內務府總管來保察閱京倉尋疏言漕運全資水利宜通源節流以濟運道山東漕河取資汶濟洸泗四水而四水又賴諸泉助成巨流山東一省得泉百有八十其派有五分水天井魯橋新河沂水是也五派合爲一水是名泉河舊設管泉通判今雖裁汰仍設泉夫請飭有泉州縣督率疏濬濟南兗州二府爲濟水伏流之地若廣爲濬導則散涇沙礫間者隨地涌見應立法泉夫濬出新泉優費銀米歲終冊報爲州縣課最諸泉所匯爲湖十五各設斗門爲減水閘以時啓閉漕溢則減漕入湖漕涸則啟湖濟漕號諸湖爲水櫃其後居民壅水占耕墾圯閘塞低處多生茭草高處積沙與漕河隄並請察勘未耕之地就低處挑深卽以挑出之土築隄復水櫃之制諸湖開支河以承諸泉之入益漕河之流建閘以時減放舊制運河於每歲十月築壩分洩諸湖來春三月冰泮開壩受水法久玩生築壩每至十一月則失之遲開壩在正月初旬又失之早請飭所

築司必十月望前開必二月朔後以循舊制汶水分流南北運道攸賴明宣德間築戴村壩於汶水南以遏汶水入洸建坎河壩於汶水北以節汶水歸海嘉靖時復堆積石灘水溢縱使歸海水平留之入湖歲久頽廢萬一汶水北注挾湖泉盡歸大清河四百餘里運道所關非小請飭總河相度形勢修復舊石灘改建滾水石壩以爲蓄洩上命內閣學士何國宗等携儀器與圖會總河齊蘇勒巡撫陳世倌履勘請如廷錫奏下九卿議行四年遷戶部尙書充順天鄉試考官既入閣諭曰廷錫佐怡親王董理戶部諸事秉公執正胥吏嫉妒懷怨今廷錫典試或乘此造作浮言妄加謗議令步軍統領順天府尹五城御史察訪捕治尋命兼領兵部尙書遭母喪遣大臣奠茶酒予其母封誥發帑治喪命廷錫奉母喪還里葬畢還京在任守制六年拜文華殿大學士仍兼領戶部充聖祖實錄總裁七年加太子太傅命與果親王允禮總理三庫予世職一等阿達哈哈番九年廷錫病上遣醫療治十年夏病復作上命日二次以病狀奏聞五月卒上爲輟朝遣大臣奠茶酒賜祭葬諡文肅廷錫工詩善畫事聖祖內直二

十餘年世宗朝累遷擢明練恪謹被恩禮始終子溥字質甫雍正七年賜舉人八年進士改庶吉士直南書房襲世職廷錫卒溥奉喪歸命葬畢即還京供職十一年授編修四遷內閣學士乾隆五年授吏部侍郎疏言凡條奏發九卿會議主稿衙門酌定准駁會議日書吏誦稿以待商度其中原委曲折一時難盡請於會議前二日將議稿傳鈔俾得詳勘暢言至命盜案刑部例不先定稿俟議時平決不關命盜各案亦宜先期傳知庶爲審慎下部議如所請八年授湖南巡撫九年疏言永順及永綏乾州鳳凰諸處苗民貪暴之習未除城步綏甯尤多狡惡臣整飭武備漸知守法諭曰馭苗以不擾爲要次則使知兵威不敢犯此奏得之旋劾按察使明德不詳鞠盜案奪官驛鹽道謝濟世老病休致給事中胡定奏請湖南濱湖荒土勸民修築開墾令溥察議溥奏言近年湖濱淤地築墾殆徧奔湍東爲細流洲渚悉加堵截常有衝決之慮沅江萬子湖湘陰文洲圍士民請修築開墾臣親往履勘文洲圍倚山面江四圍俱有舊隄已議舉行萬子湖廣袤八十餘里四面受水費大難築並於上下游水利有礙臣以

爲湖地舉築已多當防湖患不可有意勸墾上睦之十年授吏部侍郎軍機處行走十三年擢戶部尙書命專治部事十五年加太子少保十八年命協辦大學士兼禮部尙書掌翰林院事二十年兼署吏部尙書二十四年授東閣大學士兼領戶部二十六年溥病上親臨視及卒復親臨奠贈太子太保發帑治喪賜祭葬諡文恪子興進士自編修累遷兵部侍郎賜榮初授雲南楚雄知府再至戶部侍郎並坐事奪官左授光祿寺卿復奪官以世職守護裕陵

邁柱喜塔拉氏滿洲鑲藍旗人初授筆帖式三遷戶部員外郎授御史康熙五十五年巡視福建鹽課雍正元年巡視甯古塔三年命如荊州會將軍武納哈籍前任將軍阿魯家債侵蝕兵餼議荊州近縣民有願蠲地者官購俾兵耕種或招田徵租兵婚喪量飲之下部議行擢工部侍郎調吏部命如江西按治德安知縣肅彬武甯知縣廖科齡虧帑並命察通省錢糧積弊尋命署巡撫疏請以江西額徵丁銀攤入地糧從之五年授湖廣總督命俟江西事畢赴任邁柱疏陳江西倉穀虧缺弊在無穀無銀虛報存貯及至交代又虛報民間借領後

任徵迫悉歸無著又或出糶倉穀得價侵用及至交代以二錢一石折價後任不敷糶恤又或因不敷之故併此折價而亦侵用及至交代復稱民欠多方掩飾皆因前任巡撫裴率度布政使陳安策張楷徇庇所誤上爲奪率度等官察究追完又言江西通省公用需欸請視河南湖廣諸省例提州縣耗羨二分充用另提充各員養廉多至一分五釐少至四釐餘仍留州縣養贍巡撫及司道亦於所提一分五釐內量行支用又言江西被災州縣設廠煮賑米價石至一兩三四錢請於未被災州縣發銀預購平糶又言南安贛州閩廣交界及鄱陽湖濱最易藏奸萬載甯州等地棚民聚集素好多事已飭嚴整塘汛操練標兵豫爲之備得旨嘉其條畫詳晰令新任巡撫照行尋諭定彬等俱論斬並請令徇庇之上官分償虧帑上命自雍正六年起著爲例獎邁柱秉公持正下部議敘乃赴湖廣任湖廣瀕江州縣頻年被水邁柱令民間按糧派夫修築江隄議定確估土方夫數及加修尺寸並歲修搶險諸例疏聞上發帑六萬命視工多寡分給鎮簞苗最悍屢入內地剽掠邁柱疏言臣聞雲南提督張嗣正先任鎮



軍總兵以鵬則法治苗聞有警調爲何種苗所屬何寨即擄兵馳往圍寨搜擒如鵬之捕鳥取其速而鳥可必得臣今與總兵周一德循行此法但期得罪人而止不敢多爲殺戮居數年又疏言收繳六里鎮軍土司所藏鳥鎗完整者俾兵充用餘改造農具給土苗耕作土苗所用環刀標鎗亦令給價收繳上諭曰所奏深得實刀買帽之意環刀標鎗自當收繳可順其願不宜強迫疏定苗與民爲市於分界地設市一月以三日爲期不得越界出入民以物往市預報地方官知會塘汛查驗苗縣立苗長選良苗充民壯備差遣訪緝鄂爾泰督雲貴建策改土歸流邁柱亦行之湖廣收永順保靖桑植三土司永順設府縣仍其名又於府西北設縣曰龍山保靖桑植各設縣仍其名收容美土司設州曰鶴峯所屬五峯所設縣曰長樂並改彝陵州爲府曰宜昌領新設州縣收第岡土司改永定衛爲縣以其地屬焉上命通察湖廣積欠錢糧都計銀三十餘萬令與巡撫馬會伯王國棟同董其事逾年報湖南已完六萬有奇湖北已完八萬有奇尋察出沔陽積欠內爲官侵役他包攬未完者三萬有奇其實欠在

民者三萬二千有奇上以沔陽常被水民欠命予豁除七年邁柱疏請以湖廣額徵丁銀攤入地糧從之邁柱督湖廣數年聲績顯著他所區畫如以洪陽通判移漢口荊州通判移沙市又裁施州大田二衛所合爲縣曰恩施復請改爲府曰施南設縣四曰宣恩來鳳咸豐利川宜昌旣爲府設附郭縣曰東湖又以歸州及所領長陽興山巴東諸縣隸焉道州及甯遠永明江華諸縣隣廣西請以永州同知移江華並分設游擊守備調駐兵千五百與廣西桂臨營月三次會哨永順保靖桑植三營新立月餼給米折永順石折一兩保靖桑植石折六錢以苗疆米貴不與他營同上悉如所請十三年召拜武英殿大學士兼吏部尙書乾隆元年兼管工部二年以病乞解任三年卒賜祭塋諡文恭同時督撫入爲大學士者又有白潢趙國麟潢字近微漢軍鎮白旗人初授筆帖式考授內閣中書遷侍讀授福建糧驛道僉事以父憂去官服闋除山東登萊青道僉事遷貴州貴東道參議以巡撫劉蔭樞薦就邊按察使潢操守廉潔聞於聖祖擢湖南布政使未上官蔭樞以請緩西師命詣軍前察視潢護貴州巡撫貴

州山多田少諸鎮營兵饑米於徵米諸州縣支發以運道艱阻改徵折色遲至次年春夏米值昂不足以糴諸驛例設夫百馬四十五而巡撫以下私函付驛謂之便牌役夫至數百潢奏請兵米於藩庫借支州縣徵解歸項並檄諸驛禁便牌兵民困皆蘇又以貴州僻遠官於外商於外皆不肯歸潢奏請勒限回籍貴州民初以爲不便久之文物漸盛乃思潢惠焉蔭樞還貴州調潢江西入覲至熱河謁上即擢江西巡撫潢革諸州縣漕節陋例並令火耗限加一舊加至三四者悉罷除之不率者奏劾湖口關地險港窄潢度關右武曲港山勢開闊可容千艘乃濬江口建草壩使估舟得聚泊建亭頌潢德會城西南有袁贛二江至臨江合流舊有隄久圯春夏水發往往壞田廬潢奏請重建九閱月而成民自是無水患號爲白公隄五十九年奏請補京職授戶部侍郎擢兵部尙書六十一年世宗即位命協辦大學士尋授文華殿大學士疏辭不許充聖祖實錄總裁雍正三年以疾乞解任許之潢撫江西時南昌吉安撫州饒州四府舊有落地稅千三百兩有奇設大使徵收潢以官役苛徵令停收巡撫司道公捐

代納僞編納稅人名冊報部王企喈裴率度代爲巡撫皆如潢例及汪滌至以其事聞且請裁大使上曰國家經制錢糧豈可意爲增減若此稅不當收潢當請豁免何得以公捐代完佔名邀譽下部議奪潢官滌亦坐左遷稅如舊例徵收乾隆二年潢卒命還大學士銜國麟字仁圃山東泰安人祖瑗手書春秋內外傳史漢蒙文授之篤志於學以程朱爲宗康熙四十五年進士五十八年授直隸長垣知縣當官清峻以禮導民民戴如父母世宗聞其賢雍正二年擢永平知府三遷福建布政使調河南擢福建巡撫調安徽御史蔣炳奏請州縣徵收錢糧依部頒定額刊印山單申布政使覈發國麟以安徽通省數百萬由單由司覈發恐誤徵收疏請停止內閣學士方苞疏言常平倉穀原定每年存七糶三南省地卑濕應令因地制宜下督撫詳覈國麟疏言安徽所屬州縣濱江湖者當改糶半存半他州縣仍循舊例並下部議行乾隆三年擢刑部尙書調禮部兼領國子監四年授文華殿大學士兼禮部尙書六年御史仲永檀疏劾內閣學士許王猷邀九卿至京師民僉長庚家弔喪國麟亦親往下王大臣勘

不實國麟乞引退上留之俄給事中盧秉純復論國麟當上舉永懷疏面詰陽若不知出告其戚光祿寺卿劉藩長藩長被命休致國麟又告以爲侍郎蔣炳所劾上命大學士鄂爾泰張廷玉召國麟及藩長相質藩長力辨上命毋深究令鄂爾泰張廷玉諭國麟引退國麟疏未即上上降詔詰責左授禮部侍郎七年擢尙書國麟乞引退不許逾數月復以請上不悅命奪官在咸安宮効力八年乃許其還里十五年詣京師祝上壽賜禮部尙書銜明年卒

田從典字克五山西陽城人父雨時明諸生寇亂挈子及兄之孤徙避度不能兼顧棄子負兄子以走賊退求得子草間即從典也從典篤學以宋五子爲宗康熙二十七年成進士旋居父喪事必遵家禮服終就選三十四年授廣東英德知縣縣地瘠賦籍不可稽詭寄逋逃民重困陋例兩加至八九錢名曰均平從典盡革之清其籍四十二年行取四十三年授雲南道御史疏言督撫不拘成例請調州縣有秉公者即有徇私者州縣求調其弊有三圖優缺避衝繁預爲卓薦地督撫濫調其弊亦有三徇請託得賄賂引用其私人名爲整頓地方

簡拔賢良實乃巧開捷徑屢經敗露有駭聽聞嗣後請除江浙等省一百一十餘縣錢糧難徵及邊遠煙瘴地仍舊例調補其他不准濫調又疏言京官考選科道令部院堂官保送恐平日之交結臨時之營謀在所難免請敕吏部遇考選科道凡正途部屬及自知縣升任中行評博與翰林一體論俸開列聽候考選均下部議行巡視西城罷鋪墊費察通州倉儲儼神祠以居廟祝不受值不入也四十九年擢通政司參議屢遷轉授光祿寺卿寺故有買辦人虧戶部帑至四十一萬餘從典請限年帶銷遷左副都御史再遷兵部侍郎並命兼領光祿寺五十八年遷左都御史兩江總督常鼎疏言安徽布政使年希堯鳳陽知府將國正婪取爲屬吏所訐命從典與副都御史塔沂往按國正坐斬希堯奪官五十九年擢戶部尚書雍正元年調吏部二年協辦大學士三年授文華殿大學士兼吏部尚書六年三月乞休優詔褒許加太子太師致仕賜宴於居第令部院堂官並集發帑治裝行日百官祖饒馳驛歸里驛道二十里內有司送迎入辭賜御膳聯並冠服朝珠四月乃行甫一舍次良鄉病大作遂卒年七十

八上聞以從典子懋幼遣內閣學士一侍讀學士一爲治喪散秩大臣一侍衛  
六奠茶酒並命地方官送其喪歸里賜祭葬諡文端懋自廢生授刑部員外郎  
世宗命改吏部選郎中授貴州道御史乾隆初遷禮科給事中疏言河南秋審  
寬縱巡撫尹會一按察使隋人鵬下吏議又劾工部尙書趙宏恩受賄奪官戍  
軍臺遷鴻臚少卿高宗獎懋敢言超擢副都御史遷刑部侍郎調吏部十一年  
上責懋奏事每漏言且嗜酒務博命解任歸里讀書十四年召授吏部侍郎以  
僕從鬥毆傷人責懋舊習未悛仍命歸里讀書家居二十年卒高其位字宜之  
漢軍鎮黃旗人父天爵語在忠義傳其位初隸鎮白旗自筆帖式管佐領康熙  
間以署參領從軍駐襄陽叛將楊來嘉王會等以二萬人出掠將攻南漳其位  
率二十騎覘敵與遇越敵隊入南漳與共守敵圍攻不能下叛將譚宏以三萬  
人犯鄖陽其位將百人扼楊谿鋪與相持七十餘日糧盡煮馬糲以食副都統  
李麟降援至合擊大敗之尋追論禦敵穀城失利奪官久之授火器營操練校  
尉襲其祖尙義二等阿達哈哈番從大將軍裕親王福全討噶爾丹戰於烏蘭

布通破駱駝營擢參領授甘肅永昌副將明法令築堡塞邊境肅清遼湖廣襄陽總兵擢提督賜孔雀翎鑾轡鞍馬調江南兩江總督常肅有疾上命其位署理世宗即位召入覲旋命回提督任奏請保護聖躬上褒其有愛君之心溫詔嘉許雍正二年秋奏飛鴉食蝗秋禾豐茂上以蝗不成災傳示王大臣賜詩褒之冬奏進黃浦漁人網得雙夔龍紐未刻玉印上賜以四團龍補服三年授文淵閣大學士兼禮部尚書加太子少傅以衰老辭不許改隸鎮黃旗賜壽寶勝聯及白金千屢乞休乃命以原官致仕五年卒賜祭塋諡文恪子高起以廕生授四川茂州知州累遷兵部尚書坐事奪官逮治乾隆初戍軍臺釋回卒遜柱棟鄂氏滿洲鎮紅旗人曾祖郎色太祖時從其兄郎格來歸遜柱初授筆帖式擢工部主事再遷戶部郎中授御史歷翰林院侍讀學士內閣學士盛京工部侍郎召改吏部擢兵部尚書雍正五年署大學士旋授文淵閣大學士仍兼兵部尚書遜柱長兵部十六年屢陳奏部政多所考覈釐正十年以老命不必兼兵部十一年致仕卒年八十四諡褒遜柱醇厚和平賜祭塋



尹泰章佳氏滿洲鎮黃旗人初授翰林院筆帖式再遷內閣侍讀康熙二十七年授翰林院侍講充日講起居注官三十四年授國子監祭酒三十七年改錦州佐領五十二年以病罷遂居錦州世宗在藩邸奉命詣奉天謁陵過錦州宿焉與語奇之見其子尹繼善雍正元年召授內閣學士遷工部侍郎再遷左都御史疏言六科書吏賄通提塘造爲小鈔晚帖內開口傳諭旨或誤繙清文甚至僞造上有賜予及與諸臣問對應請禁止二年充會典總裁三年命以原品署盛京侍郎兼領奉天府尹疏言承德等九州縣原徵豆米多貯無用請自雍正四年始停徵黑豆按畝徵米按丁徵銀而以原貯米豆視時價出糶又言關東風高土燥請掘地窖藏存穀以節建倉工費四年山海關總管多索禮疏言應交莊頭餘地尹泰不卽派官丈收命侍郎查郎阿往按坐解府尹任仍以左都御史協理奉天將軍將軍噶爾弼議設外海水師尹泰以爲旅順天津俱有水師錦復蓋諸州亦可更番巡察增設需費浩繁於巡察無益別疏以聞下議政王大臣議如尹泰言六年坐遺漏入官財產奪官尋命復官七年正月與尙

書陳元龍同授額外大學士尋授東閣大學士兼兵部尙書十三年高宗即位充世宗實錄總裁乾隆元年以老病乞罷上留之尹繼善自兩江總督入覲授刑部尙書俾使朝夕侍養三年復乞罷命以原官致仕尋卒賜祭葬諡文恪尹繼善自有傳陳元龍字廣陵浙江海甯人康熙二十四年一甲二名進士授編修直南書房郭琇劾高士奇辭連元龍謂與士奇結爲叔姪招納賄賂命與士奇等並休致語互詳士奇傳元龍奏辨謂臣宗本出自高譜牒炳然若果臣交結士奇何以士奇反稱臣爲叔事得白命復任累遷侍讀學士元龍工書爲聖祖所賞當命就御前作書深被獎許上御便殿書賜內直翰林諭曰爾等家中各有堂名不妨自言當書以賜元龍奏臣父之閭年逾八十家有愛日堂御書榜賜之四十二年再遷詹事以父病乞養歸賜葭時正編賦彙令携歸校對增益上南巡元龍迎謁御書榜賜之閭及元龍母陸之閭卒喪終召元龍授翰林院掌院學士五十年遷吏部侍郎授廣西巡撫值廣東歲歉廣西米價高元龍遣官詣湖南採米平糶五十四年修築興安陡河開護兩廣運道並於省城擴

養濟院立義學以育嬰堂建倉貯穀五十七年擢工部尙書六十年調禮部世宗卽位命守護景陵七年與左都御史尹秦同授額外大學士尋授文淵閣大學士兼禮部尙書元龍在廣西請開例民捐穀得入監李紱爲巡撫請以捐穀爲開墾費上責其借名支銷命元龍詣廣西清理紱旋奏元龍分得羨餘十一萬有奇除在廣西捐公費九萬又助軍需十萬今倉穀尙有虧空應令分償及授大學士命免之十一年以老乞休加太子太傅致仕令其子編修邦直歸侍養行日賜酒膳令六部滿漢堂官餞送沿途將吏送迎乾隆元年命在籍食俸尋卒賜祭葬諡文簡

論曰軾以德望尊徐元夢以忠譽重世宗謚允禩允禩徐元夢言二人罪當誅願上念手足情緩其死二人者旣死吏議奴其子軾言二人子實爲聖祖孫執政奴之世宗皆爲動容諒哉古大臣不是過也廷錫直內廷領戶部邁柱等領疆節卓然有績效從典尹秦皆以端謹奉職古所謂大人長者殆近之矣